

東  
華  
續  
錄

東華續錄

咸豐六十九

臣王先謙敬編

臣陶潛宣蒸校

三月癸丑朔曾國藩奏臣接到家信知臣父於二月初四日病故

臣例應丁憂溯查臣自咸豐二年奉命典試江西行至太湖縣聞

訃丁母憂回籍百日奉旨飭辦團練三年冬間疊奉援鄂援皖肅

清江面之命聲明臣係丁憂人員辦理稍有起色即當回籍補行

終喪五年九月蒙恩補授兵部右侍郎維時雖已服闋而臣之私

心常以未得守制爲隱憾今又遽丁父憂椎胸自責抱痛何極瑞

州去臣家不過十日程途應即日奔喪回籍臣經手事件以水師

爲一大端署提督楊載福駐紮九江所統外江水師十五營道員

彭玉麟駐紮吳城所統內湖水師八營合計船隻五百餘號墩位

至二千餘尊之多此非臣一人所能爲力臣在衡州時僅奏明造船百六十號岳州以下雖陸續增添而九江挫後則水師中喪其時同援湖北者僅船百餘號賴彭玉麟力支危局胡林翼楊載福重廓規模而又有廣東督臣購運洋礮湖南撫臣督率官紳廣置船隻子藥於是外江之水師始振陷入鄱湖者亦僅船百餘號賴江西撫臣竭力維持增修船礮籌備子藥於是內湖之水師亦振合四省之物力各督撫之經營楊載福等數年之戰功乃克成此一支水軍臣不過因人成事豈敢無其實而居其名惟臣因事離營內外水軍或分歧不定相應請旨特派署提臣楊載福總統外江內湖水師事務惠潮嘉道彭玉麟協理外江內湖水師事務庶幾號令歸一楊載福戰功最偉才識遠勝於臣彭玉麟備歷險艱有烈士風伏乞 聖恩時加訓勸該二人必能肅清江面仍請旨

飭下湖北撫

臣

胡林翼月籌銀三萬兩江西撫

臣

文俊月籌銀二

萬兩解交楊載福彭玉麟水營俾此軍不至饑疲則不特爲攻勦

九江湖口所必需卽將來圍攻金陵巡防長江亦必多所裨益自

水師而外惟湘勇係同縣之人寶勇係久從之卒於

臣

略有關係

見在李續賓之湘勇駐紮九江精勁樸實隱然巨鎮劉騰鴻之湘

勇普承堯之寶勇駐紮瑞州嚴明勤謹足當大敵但使餉項稍敷

必可樹立功績

臣

在軍中亦無所益卽不在軍亦無所損此外江

西水陸諸軍及各省援師自去歲以來皆由撫

臣

與

臣

會商調遣

今

臣丁憂開缺應由福興與撫

臣

會商辦理近日逆匪內亂武漢

肅清袁州奉新等處克復江西局勢似有轉機

臣

猝遭父喪不復

能料理營務合無籲懇

天恩准

臣

在籍守制稍盡人子之心

臣

已函商將軍福興巡撫文俊酌請一人前來瑞州拊循各營將士

臣卽由瑞州奔喪回里 上諭內閣曾國藩見丁父憂業經降旨  
賞假三月回籍治喪所帶湖南兵勇暫交其弟曾國華管帶惟曾  
國華職分較卑仍須有大員統帶方能得力所有曾國藩前帶水  
師兵勇著派提督銜湖北鄖陽鎮總兵楊載福就近統帶廣東惠  
潮嘉道彭玉麟協同調度該侍郎假滿後著仍遵前旨卽赴江西  
督辦軍務以資統帶○諭軍機大臣等前據駱秉章奏曾國藩見  
丁父憂當經降旨令該侍郎回籍賞假三月治喪見在曾國藩卽  
由瑞州回籍福興文俊何人前往瑞州接辦軍務福興原擬往勦  
撫建一路今是否另派大員帶兵前往撫建抑該將軍仍自行前  
往務須斟酌盡善不可顧此失彼至曾國華本係降服著傳諭該  
員仍遵前旨暫畱江西管帶兵勇歸楊載福等調度俟曾國藩假  
滿回至江西再令回籍其水師軍營所需糧餉最關緊要著文俊

設法籌辦並咨照官文胡林翼一體籌撥接濟毋使缺乏揚載福駐紮九江屢獲勝仗今命就近統帶曾國藩一軍聲勢必能聯絡著卽與彭玉麟協力同心督兵剿辦以期克復堅城肅清江面將此由五百里各諭令知之○甲寅諭軍機大臣等福興等奏籌辦攻守情形並王懿德等奏江右逆匪竄擾弋陽鉛山等縣調撥兵勇防堵崇安各一摺逆匪窺伺廣信已非一日該郡爲江西全省藩籬且係接壤閩浙之路該將軍見已帶兵赴剿擬請飭調張從龍之兵聽候調遣先保東路要區再圖規復他處所籌尙合機宜惟閩省崇安縣屬分水等關距鉛山甚近光澤縣黃石口村莊已被該逆焚毀聯甲兵勇已駐鐵牛關且內地敗匪復在建陽書坊一帶嘯聚內外兼顧兵力不敷雖經王懿德等另調各標營官兵一千名並募漳泉壯勇各五千名令署總兵懷塔布帶往崇安駐

紮而邊防喫重所有張從龍等兵勇已經該督撫飭令固守杉關兼辦鐵牛關防務其續調赴江援剿之福甯漳泉兵勇一千六百名亦據該督撫截畱堵禦此時自難調往廣信本日復據晏端書奏稱廣信存城兵勇尙有八千名足資堵剿是以令饒廷選駐紮玉山防堵福興抵廣信後如有可用之兵著酌量調撥或由貴溪弋陽鉛山等處相機進剿翼與閩兵會合王懿德等亦須飭令懷塔布等一面嚴防本境一面隨剿隨進俟福興帶兵行近建昌卽行會合不復區分畛域株守閩疆至江西逆勢方張福興已赴廣信曾國藩於拜摺後卽行回籍瑞州一軍見派何員接辦抑止畱曾國華統帶著文俊妥籌辦理隨時具奏將此由六百里各諭令知之○乙卯諭軍機大臣等王慶雲奏南陽等處被水災民請籌賑恤一摺河南省上年被蝗春雨復未優渥糧價昂貴據聞南陽

一帶饑民至以樹皮充食該處本多逆匪恐其乘機裹脅且襄樊  
匪徒見竄內鄉淅川尤虞勾結滋事上年該省辦賑碾動倉穀四  
萬石據英桂奏散放以後尙須畱爲今春青黃不接之時酌量放  
糶卽著英桂等體察情形所有南陽一帶災荒較重之區速將此  
項餘贖倉穀散放接濟惟災區較廣深恐不敷並著督飭該地方  
官等勸諭紳富協力捐貲源源賑濟以期弭患未萌將此由四百  
里諭知英桂並傳諭布政使英榮知之○丙辰諭內閣綿洵等奏  
勦匪獲勝首犯投誠並官文胡林翼奏勦辦襄鄖匪徒情形各一  
摺湖北匪徒劉尙義等自荊門州被勦後竄踞南漳縣屬武安堰  
地方二月十四十五等日經知府唐訓方帶勇追勦殲斃七八百  
名逃散無數自十七日至二十日副都統銜巴揚阿帶兵踵至四  
面圍攻復斃匪眾無算該匪等窮蹙無路於二十三日率眾投誠



業經綿洵等委員察看係屬實情著准其分別辦理所有被脅難民卽行安爲遣散投誠各犯歸入巴揚阿營中隨同打仗立功贖罪其未經回籍各川勇並著分起委員妥爲押解毋任再滋事端見在穀城等處另股匪徒尙未盡淨著官文胡林翼卽飭巴揚阿唐訓方等實力進剿趕緊肅清並會同陝豫官軍合力接捕盡絕根株毋畱餘孽○諭軍機大臣等前因正陽關情形喫緊諭令勝保酌撥兵勇數百名往援或令袁甲三酌帶兵勇前往本日據袁甲三馳奏霍邱股匪直撲正陽關並有李兆受帶領粵匪由正陽關竄圍壽州雖經官軍疊次擊敗該匪等尙在城外盤踞等語是該處匪蹤延蔓實爲可慮袁甲三自係尙未奉到前旨惟此時情形緊急著卽馳赴正陽關督同金光飭等實力堵剿並先將竄往壽州之匪迅速掃蕩以免該匪等南北勾結亳州鄧家園等處剿

辦亦屬緊要袁甲三南下後深恐兵力單薄著英桂勝保添派兵  
勇赴毫協同朱連泰進攻俾得速行蒞事至正陽關壽州等處均  
屬皖境福濟身任巡撫不得因派委有人竟以誘之豫省此時如  
有兵勇可撥著卽派撥前往會合袁甲三金光飭所帶兵勇實力  
攻勦毋得稍存膜視將此由六百里各諭令知之○袁甲三奏捻  
匪起事之初本非叛逆亦非敵寇不過鄉里光棍意氣爭強因而  
號召無賴倚爲爪牙久之窮民趨附聲勢恣意搶掠或擇肥而噬  
或冤讎相報漸致橫行無忌不得不興師動眾示以兵威又或兵  
力偶挫兇餒愈張或辦理失宜誅戮太甚該匪等自知罪在不赦  
不甘待斃每一交仗勝則附從益眾敗則死黨益堅迨至蹂躪之  
區村落成墟無可掠食又不得不分赴完善之地焚搶投括使夥  
黨有利可圖不至離散此所以東奔西突日久未能掃除也臣查

自古用兵殲厥渠魁脅從罔治非徒施寬大之恩也治亂民如治亂絲未有不爲分辨而能得其條理者從前嘉慶年間三省教匪作亂用兵七八年疊奉 上諭逾格施恩曲爲寬宥人心始獲安定今捻匪滋事合計三省兵力斬擒不下十萬草薶禽獮不可勝誅在事諸臣非不出示曉諭勸令改過投誠其中畏法悔罪者亦復不少惟旣已陷於賊中深恐官雖不究而被害之家必將尋讎殺戮未奉恩綸終懷猶豫可否籲懇 天恩明降諭旨除張落刑與得等罪大惡極必須設法斬擒以彰天討並聚眾抗拒者仍須一意勦捕外其被逼入夥者或殺賊立功或自拔來歸一概准予自新並不究其旣往庶無歸之民各有生路賊勢日孤人心日定化莠爲良似亦蕩平之一助也得旨汝此奏自係實情勦撫固應隨時相機辦理惟目下尙非其時須俟大獲勝仗後必應降旨若

見在止博寬大之名倒懸者未解徒畏梟獍之兇噬非計之得也  
○予湖北傷亡協領德廉祭葬世職○丁巳諭內閣福濟奏因病  
懇請開缺專辦軍務等語安徽省自和春調往江南鄭魁士復經  
獲咎福濟以巡撫督辦軍務責任自重況見在賊勢鴟張屬邑被  
陷軍務與地方公事均係緊要何得輒請開缺致負委任所請著  
不准行○諭軍機大臣等前因皖省無爲州城被陷卽諭官文等  
分兵一千名赴廬助剿嗣因桐城兵潰廬州喫緊復經諭令官文  
等將前調官兵一千名迅速派往並諭晏端書鄧紹良就近酌撥  
兵一千名或數百名渡江繞道赴廬州軍營聽候福濟調遣本日  
據福濟奏逆匪大股衝撲柘皋我軍迎擊失利柘皋距廬止數十  
里孤城危急已在呼吸之間等語該處需兵情形實屬萬分緊急  
前諭官文胡林翼派調之官兵一千名無論刻下業經啟程與否

著再添派官兵一千名並派得力大員管帶由黃州至宿松太湖一帶馳赴廬州軍營交福濟調遣至前諭在甯國軍營酌撥官兵一千名並著晏端書飭令迅速馳赴廬州藉資援救毋稍遲緩另據福濟片奏藩司畢承昭前在浙江措交浙海關賠款銀二千二百九十兩零見因皖省緊迫擬請解皖捐助軍需所有浙關賠項該藩司已在廬州糧臺呈繳卽可扣抵欠撥皖餉著晏端書查明畢承昭在浙措交賠項銀兩迅速派員解赴廬州軍營以應急需將此由六百里加緊各諭令知之○諭福濟奏壽州被圍緊急請飭勝保迅督大隊赴援一摺逆匪擁眾數萬由正陽進逼壽州四面合圍情形萬分緊急雖經福濟由廬州撥兵堵禦惟逆勢方張恐兵力難資抵禦勝保此時正在北路剿辦捻匪北路藩籬亦關緊要能否分身前赴壽州殊未可定著英桂勝保迅卽籌商如勝

保可以帶兵前往卽行酌帶兵勇馳往救援如一時未能兼顧亦應派兵助剿不得因其地處淮南稍存畛域之見昨有旨命袁甲三前赴正陽督同金光飭進剿正陽距壽州不過數十里袁甲三帶兵前進卽可先解該州之圍以扼淮南北要衝至柘皋防兵失利退守失塘關廬州門戶已失前調湖北皖南兵各一千名本日已降旨飭催並諭湖北再添調一千名由宿松太湖一帶赴皖其德興阿和春營中兵勇前據奏報實已無可抽撥所有江北派出之官兵五百名早已抵廬丹陽派往之官兵八百名卽著福濟趕緊催提以資攻剿所請飭催餉銀之處已據戶部疊次飛催矣將此由六百里加緊各諭令知之○安徽巡撫福濟奏軍務摺報仍令鄭魁士會銜得旨汝於該鎮忽參忽保迄無定見云伊度越諸將則身任封圻者能無愧乎見未便明降諭旨又派伊統帥非

爲汝惜實爲大局所關也○復安徽桐城陣亡已革總兵官郝光甲職予祭葬世職謚武節○予安徽殉難訓導夏濟川等湖北殉難司獄陳惟和祭葬世職○已未諭內閣英桂奏襄樊土匪闖入內鄉縣城經官兵會同克復一摺二月十七日襄樊土匪竄擾內鄉縣署知縣楊鏞帶勇出城迎擊賊已分股竄入縣城總兵邱聯恩等合隊進剿該匪出西南兩門抗拒我兵槍礮齊施斃賊甚多匪眾往西北敗退我兵追擊二十餘里該匪等開北門逃竄立將城池克復見在餘匪回竄楚境著邱聯恩乘此聲威迅速追捕兇勦殲茲醜類勿畱餘孽署內鄉縣知縣楊鏞有無棄城逃避情事並在城文武各員弁下落著英桂查明具奏○諭軍機大臣等英桂奏嵩縣匪徒竄擾見籌剿辦等語據稱嵩縣所屬龍王廟一帶突有匪徒豎旗訛索錢文經官兵往捕膽敢在汝泗鎮等處放火

焚燒聚眾抗拒該處係完善之區豈容匪徒肆行焚掠亟應及早撲滅以靖地方著英桂嚴飭河南府知府樊琨認真督勦迅獲首犯解散脅從毋任蔓延爲患見在內鄉股匪業經擊退邱聯恩等勦辦竄匪如已得手亦可酌量抽撥兵勇以資進勦惟豫省兵力較單該縣逼近陝境卽著曾望顏就近酌派兵勇會合豫兵前往勦辦並飭所屬整頓團練勿令匪蹤越竄勝保督辦固始擒匪已解城圍見在潁州擒眾屯聚勝保由烏龍集進勦正可先將潁郡擒匪勦除遏其北竄至壽州被圍雖經福濟派兵往援但兵力甚單恐難濟事前令袁甲三往正陽是否能策應壽州抑須再添兵勇助勦方能得力著英桂勝保迅籌妥辦見當擒勢鴟張又有勾結粵匪之說該撫等務當督率皖豫官兵聯絡一氣毋分畛域以期迅速奏功將此由六百里各諭令知之○諭前因廬州賊眾兵



單餉需缺乏當諭晏端書迅撥甯國軍營官兵一千名赴廬救援並著撥銀四五萬兩以資接濟茲據該撫奏稱皖南三衢同時告急自顧不暇兵力已無可籌撥自係實在情形惟餉銀毫無接濟豈得謂之不分畛域見在廬州缺餉危在呼吸浙江近在鄰封若坐視其餉竭兵潰大局攸關何堪設想該撫於省局籌餉則豫爲之謀於鄰封則涓滴莫及何氣習之深若是著晏端書竭力設法量籌接濟迅解廬州不准藉詞推諉致滋貽誤將此由六百里諭令知之○諭江南軍務從前張國樑與福興共事尙能迅解金壇之圍乃自和春到後數月之久句容一邑尙未克復是否和春與張國樑意見不合以致該鎮未能用命軍營統帥全在能得人心儻駕馭無方健將不肯出力貽誤非輕怡良近在常州必能確有見聞著卽確查密奏至余萬清收用劣員盧應翔經和春奏請撤

去幫辦軍務業已降旨允准惟余萬清攻勦鎮江如果不能得力該大臣早應據實參奏何以因收用盧應翔一節輒請撤去幫辦恐和春因該員別有劣蹟遇事而發著怡良一併密行訪查如余萬清平庸著該督會同和春於江南軍營察看何員可以接辦鎮江軍務酌保一二人速行奏聞候旨更換再本日崇恩奏豫籌防護海運事宜一摺據稱近年滋事洋盜皆係閩廣艇匪若能於佗山一帶扼據險要盜匪斷難北竄等語本年海運漕船已據該督等酌定章程募雇勇船在洋巡緝並有輪船分別駐泊著卽嚴飭該員弁務於佗山五條沙一帶巡防扼守毋令閩廣匪船乘間北竄並遵照成案令護漕師船至東省石島洋面交替明白再行南下俾南北水師均有責成庶不至稍有疏失將此由四百里密諭知之○辛酉以克復甯國府城復道員鄧瀛職免知府顏培文罪

均畱任效力○壬戌諭內閣和春奏攻剿溧水連奪賊壘大獲勝  
仗一摺江南溧水賊匪經官兵屢次痛剿勢已窮蹙二月初七日  
賊由烏山曹村一帶來援和春派令副將魯占鼇等奮力剿殺斃  
賊百餘名金陵安慶大股賊匪竄至鄔山築壘傅振邦督同馬步  
分路進攻並於山後埋伏賊匪五六千人分股迎敵兵勇且戰且  
卻佯敗誘賊都司鄧聯科等伏兵齊出逆匪大股奔逃我軍乘勝  
追剿斬賊甚眾二十日賊匪復過河築壘三座和春派李定太等  
分途齊進賊匪約三四千人出巢迎敵周天培等帶兵搶至外濠  
槍礮連環火箭噴筒齊發賊眾驚潰立將賊營四座奪獲餘匪奔  
逃退至河濱落水者不計其數兵勇搶至河岸又斃多賊復將鄔  
山五座賊壘奪獲賊向柘塘逃逸所有該處賊營一律踏毀共計  
奪獲賊壘二十六座斃賊三千餘名該逆負嵎死守著和春卽督

飭在事文武員弁迅將城池趕緊克復毋得再事遷延致干重咎  
○諭軍機大臣等御史毛昶熙奏山東省城被災較重請飭查辦  
賑濟並稱該省於咸豐四年曾買雜糧六萬餘石爲守城之儲至  
今仍存省城可撥爲賑恤之用又聞該省上年開捐賑局共存銀  
三十一萬餘兩除用過外尙存二十五萬餘兩亦可酌撥賑濟各  
等語東省連年被災曾經發帑賑濟誠恐不能徧及且閱時已久  
民間生計更難自應酌籌調濟該御史所稱糧石銀兩是否確存  
實有此數著崇恩卽飭查明酌量動用就被災較重之區辦理賑  
濟以恤民艱並著一面奏聞一面先行籌辦用副朕惠愛黎元至  
意將此諭令知之○諭和春奏攻剿溧水奪獲賊壘並句容鎮江  
獲勝情形各摺片江南軍務自紫荊山大營失陷向榮病故後金  
陵城外遂無大兵控扼句容溧水不過蕞爾小縣該逆以之牽掣

我軍而分其黨與四出滋擾見在安徽省巢無舒六相繼失陷賊蹤距廬州僅止數十里情形萬分喫緊池州蕪湖之賊窺伺徽甯浙防又形喫重由大兵不能進偏金陵故巨逆得以安居城中從容布置賊勢裹脅日多幾致官兵應接不暇見當各省荒旱兵餉缺乏日復一日伊於何底和春前在安徽督師得力張國樑在江南軍營亦素稱奮勇何至區區小邑曠日持久不能攻克本日據奏溧水之戰擒斬尙多句容之戰仍未見得力著卽督飭將士謀勇兼施先將兩城攻下以便移師金陵使該逆有所顧忌稍戢其猖獗之形而我兵不爲句容溧水牽掣亦可分援安徽等處以期次第廓清毋得再事遷延貽誤大局將此由六百里諭令知之○

癸亥記 先農親耕藉田○諭軍機大臣等前據福濟奏請由湖南撥解米石當經諭令駱秉章酌量籌辦茲據奏稱湖南省上年

旱歉米價日昂買米四萬石需銀八萬兩合之水陸運腳共需銀  
十六七萬兩且自蘄州至六安需用人夫八萬名亦斷難於招雇  
各等語自係實在情形惟皖省缺乏米糧甚關緊要昨據英桂奏  
稱前次運送皖餉米麥六千石行至潁州因捻匪竄踞三河尖河  
路梗塞見將米石起存阜陽縣倉尙未運解此項米麥亦可藉濟  
急需本日業經諭知英桂設法解至廬州著福濟卽行派員前往  
迎提以資兵食所請飭令勝保由正陽進剿六安之處亦已諭知  
英桂勝保酌量辦理廬州情形喫緊前諭調之皖南官兵已據晏  
端書奏稱一時未能分撥湖北軍營已派臬司李孟羣帶兵一千  
五百名赴皖助剿該撫卽督同鄭魁士妥爲布置協力堵禦奏定  
三已有旨令其統領原帶貴州官兵前赴和春軍營隨同剿辦矣  
將此由六百里諭令知之○福濟鄭魁士奏據署廬鳳道金光筭

稟稱二月十九日賊船數百號賊馬數百匹向西北撲來城上開放火槍擊斃馬賊六名賊旋退回二十日該逆擁眾由南關攻城該署道會同遊擊成桂等督飭署壽州知州黃元吉署鳳臺縣知縣李霖統率兵勇由西門出城繞出賊營該逆迎拒經勇目李士申等及壽州營兵奮擊刺斃賊數百名斬首五十餘級焚毀賊營七座二十一日該逆由東門外蠶擁而來我軍開礮轟擊當斃馬賊數名步賊數十名賊不敢進遙聞東北十餘里外槍聲不絕係團練姚紹孔擬在該處築壘遇賊接仗其北門外四頂山忽見黃旗徧插恐賊紮營卽令李霖督飭勇目朱在國縋城衝擊該逆東遁二十二日以後該逆更番攻城徹夜衝突間用雲梯爬城並皆擊退至二十五日被圍已歷八晝夜外援未到姚紹孔練勇亦潰因商同各文武挑選奮勇出城血戰一面暗約鄉團在十里外放

火喊殺二十五日夜調齊兵勇衝出東門各鄉火光四起該逆不知虛實疑我援兵猝至內外夾攻倉皇失措棄營狂走互相踐踏死者不計其數該署道等追剿二十餘里計斃賊三千餘名割獲首級六百餘顆城圍已解等情查壽州係淮南重地該城僅以數千兵勇支撐八日之久非謀勇素裕斷難保此危城金光飭等激勵軍民同心守禦出賊不意暗布奇謀遂令逆鋒頓挫立解重圍實屬識力過人賊雖回竄正陽該署道業經追剿惟逆眾數萬非孤軍所能支持應懇飭催勝保督帶大隊由正陽進剿六安與皖軍會合方能廓清餘孽臣等駐守廬州三面皆賊竭力守禦勉強相持斷難他顧如勝保能剋日抵六藉分賊勢當可轉危爲安上諭本日據福濟等奏壽州城圍已解請飭勝保由正陽進攻六安以分賊勢等語勝保見由烏龍集回剿穎匪諒必續獲勝仗如



該處股匪漸次掃蕩可以無虞北竄自應徑趨六安會合皖軍藉分廬州賊勢廬州三面皆賊情形甚爲喫緊福濟兵力甚單必須速爲援應著卽與英桂安速籌商酌量辦理袁甲三接奉前旨是否已赴正陽見在壽州旣無須助勦能否卽由正陽馳赴六安分勦粵逆亦著英桂等妥商速辦前據英桂奏籌解皖省米麥六千石因三河尖河路梗塞尙存阜陽縣倉見在廬州待米甚殷著英桂卽將前項米麥設法速解廬州以資接濟再據御史毛昶熙奏河南光州一帶饑民乏食至掘食草根樹皮請籌撫恤等語該處逼近匪蹤饑饉顛連已堪憫惻煽惑滋事尤屬可虞著英桂卽行籌款酌量賑恤毋使流而爲匪將此由六百里各諭令知之○以紳民勦賊出力永廣湖南新甯縣文武學額各三名○以壽州守城出力賞道員金光飭按察使銜知州黃元吉花翎○甲子諭軍

機大臣等昨有旨令秦定三帶貴州官兵前赴江南隨同和春攻  
勦本日據秦定三奏已與福濟會商帶領吉林馬隊及陝西官兵  
由臨淮水陸並進疏通餉道相機進剿等語見在廬州三面皆賊  
勢成坐困所恃以通餉道者惟在臨淮一路卽福濟前奏亦稱逆  
匪若由六安直抵臨淮則軍火糧餉無路可通是保全臨淮實關  
廬州大局該提督見旣帶兵前往卽著暫畱臨淮一帶俟剿辦略  
有就緒再行前赴江南前據庚長奏籌辦米二千石解赴臨淮轉  
解皖省嗣復諭令邵燦等速備米一二千石解往諭令怡良於截  
漕等項下籌款解皖必從淮河經過卽著秦定三督飭兵勇將淮  
河北岸匪蹤隨時剿辦妥爲護送該提督營中所需糧餉卽可於  
此項銀米經過之時酌量截畱以資接濟其餘銀米仍派兵解赴  
廬州毋稍疏失至請由北路添兵助剿之處此時實無可分撥勝

保見在潁州勦匪儼彼處得手自可馳赴六安會勦正陽一路與臨淮聲息相通已令袁甲三帶兵前進俟到關後即可與該提督合力進勦徐泗各路兵勇相距非遙亦可隨時知會互爲聲援也將此由六百里各諭令知之○丙寅諭軍機大臣等福興文倭奏兵力不敷請添調北路勁旅一摺江西西路各城圍攻正緊惟東路空虛特甚該將軍所擬力保廣信分攻撫州自係要著惟北路勁兵分調已多此時實無可抽撥湖北水陸兩軍在九江者數幾二萬旣據福興咨商官文等於李續賓所帶兵勇內分撥數千名卽著官文胡林翼斟酌速辦如九江卽可克復固應分兵接濟若攻克需時亦應移緩就急酌量抽調據該將軍擬先赴瑞州再回廣信兩處相距不遠誠恐東路策應不及著於行抵瑞州後卽由梅港東鄉一帶節節進勦直抵廣信以固閩浙藩籬瑞州營中有

無可分之兵或酌量帶往亦著妥籌分撥但不可顧此失彼致西路又形單弱南昌省城見存會國藩兵勇尙有若干能否分撥前赴撫州亦著福興等酌量辦理再前據晏端書奏廣信存城兵勇不下八千名福興前赴該郡亦可就近調撥分投勦辦至所請由浙協撥兵餉雖經諭令晏端書酌籌銀兩陸續解赴廣信惟浙江撥解皖南廬州等處軍餉數已不少恐卽勉力支應爲數斷不能多文俊統轄全省不應一籌莫展專恃仰給鄰封著卽督同藩司妥爲籌畫以資接濟毋得坐誤事機將此由六百里各諭令知之○諭福興奏軍餉久缺仍請飭浙省接濟等語福興一軍餉需前據何桂清奏稱該將軍過浙時曾先後籌銀大千兩應付並聲明以後艱於籌撥應由江省地方官支應自係爲皖南等處籌辦防堵需餉較鉅勢難分撥茲據福興奏賊眾軍疲事處萬難不得不

仍請浙省協濟亦屬實情且該將軍見須由省前赴廣信該處爲  
浙省藩籬尤應就近接濟卽以自固疆圉著晏端書不必拘定按  
月若干之數酌量籌撥陸續解銀數萬兩至福興廣信軍營毋得  
心存膜視致誤事機將此由五百里諭令知之○丁卯命文俊來  
京以耆齡爲江西巡撫龍啟瑞爲江西布政使由通政司副使遷○己巳  
予安徽陣亡參將師長鑢祭葬世職○庚午諭軍機大臣等英桂  
勝保奏進剿逆捻獲勝情形各摺片捻匪大股麇聚水溝集經勝  
保督兵奮擊疊獲勝仗惟該匪死黨尙多兵力不能分撥自應由  
西北節節進攻以期漸次肅清勝保見在進攻柳溝俟柳溝一破  
卽進擣三河尖目前賊勢自應如此辦理該逆奔突靡常軍情且  
夕不同必須相度機宜統籌全局英桂見由新蔡進紮阜陽縣之  
驛口橋如勝保剿辦得手仍須移營前進總期聲勢聯絡互相策

應方爲妥善壽州雖已解圍頽上一帶尙當喫緊見在大同馬隊  
吉林餘丁業已到營俟直隸官兵到後卽一面進攻一面分兵應  
援頽上袁甲三如不能前進正陽亦須分兵策應著英桂等體察  
緩急情形毋得顧此失彼致有貽誤將此由六百里諭令知之○  
辛未諭軍機大臣等恒春奏滇省回夷各匪滋擾勦辦正當喫緊  
帶兵將領乏員見署鄖陽鎮總兵王國才熟悉滇省情形回民畏  
服請飭該署總兵迅速來滇協勦等語楚北水陸各軍均已乘勢  
東下王國才正在黃梅小池口一帶勦賊自係帶兵得力之員惟  
滇省勦辦回夷各匪尙未得手較楚省尤爲喫重著官文胡林翼  
卽飭該總兵前往滇省交恒春調遣藉資熟手將此由四百里諭  
令知之○諭胡林翼奏軍餉缺乏請飭山西等省按月籌解等語  
湖北水陸各軍併力東下關繫勦匪全局襄鄖等處征兵亦須士

飽馬騰以期速行藏事見在該省年歲荒歉米價昂貴官兵欠餉五六月不等軍中僅以糜粥度日情形實屬窘迫該撫請飭山西陝西四川廣東各按月籌銀五萬兩解往以資散放自應亟籌協濟山西陝西四川三省撥解楚餉會據該督撫等陸續奏報惟楚省需餉較鉅仍著吳振械王慶雲會望顏竭力籌措源源接濟縱不能如按月五萬兩之數亦須每月撥解數萬兩俾供支放至廣東省於奉撥楚餉並未將解過數目奏報此時需餉甚急著葉名琛先行撥銀數萬兩派委妥員迅速起解嗣後仍著按月籌撥毋得稍涉推諉致誤要需將此由五百里各諭令知之○以湖北勦賊出力予候補同知李續宜等加銜升敘有差○予雲南陣亡同知鄭自耀等祭葬世職○壬申諭軍機大臣等和春奏軍餉緊迫請責成江蘇督撫籌辦並請催各省撥款一摺所有山東河南廣

東等省撥款已降旨飭催並諭怡良趙德轍無論地丁關稅捐項實力妥籌源源接濟矣和春軍營每月需餉至四十餘萬之多江蘇雖財賦之區見在止有蘇松二府尙屬完善上年又遇災荒正項錢糧既多蠲緩關稅亦未能暢旺力有不逮亦係實情上年經和春參奏當卽嚴飭籌款接濟旋據該督撫奏稱解銀三十五萬兩至大營糧臺其餘十五萬兩分給鎮江各營年內得以敷衍見又三月之久自應續籌接濟惟一隅之地勢難責其供給全軍和春前在安徽該營兵餉皆由外省協撥並非安徽一省所能支應近日廬州缺餉亦諭江蘇督撫籌濟總因用兵處所日多一日需餉日少一日爲今之計惟有早克一城卽可省一處兵勇爲撙節糧餉之上策和春自到江南句容深水未見克復一城而兩次參劾督撫恐其誤信小人之言以致文武不和有誤大局朕旣重任



和春不得不加之訓諭卽如怡良久任封疆老成歷練近因年衰多病屢經該督自陳趙德轍初任巡撫尙少諳練朕亦深知何桂清實心任事因病開缺病痊仍當畀以重任督撫大吏朕心自有權衡也至於統兵征剿乃和春專責著與張國樑協力同心早克兩城使附近地方漸臻安堵則徵收捐輸皆易爲力至江蘇勸捐各府各有紳董會同地方官承辦四年以來民情尙屬允協和春前派常州紳士趙振祚等各員前往蘇松勸捐恐本地紳董轉得藉口卸責於事無益總兵谷韞琛籍隸山東於蘇省情形更不相習本日已諭知怡良趙德轍責成本地紳士會同地方官妥爲勸諭所有和春前派各員並著毋庸前往將此由六百里諭令知之○諭前因江南大營兵餉缺乏諭令葉名琛等將廣東省月濟江南餉銀十萬兩山東河南兩省應撥江南餉各五萬兩迅將籌解

並令崇恩於京餉項下劃解銀十萬兩未據該督撫等覆奏本日據和春奏大營兵餉欠至四月有餘兵丁時有鼓譟情形急迫請飭催協餉以資接濟等語該營餉需較鉅本省解款不敷支放全賴各省協濟葉名琛等於奉撥各項未卽報解自因本省用款較多一時未能兼顧惟江南一軍關係東南大局見在既有餉竭兵潰之虞急應設法籌濟著葉名琛將月濟江南餉銀並上年欠款迅速設法陸續撥解山東省應解銀五萬兩除去年解過一萬兩外尙短銀四萬兩並京餉項下劃撥銀十萬兩河南省應解銀五萬兩著崇恩英桂遵照前旨分別籌解該督撫等務當悉心籌畫毋得稍涉推諉致滋貽誤將此由六百里各諭令知之○諭本日和春奏兵勇缺餉日多請飭趕緊設法籌撥一摺江南各營兵勇每月須餉銀四十餘萬兩前經諭令怡良趙德轍源源接濟嗣據

奏稱年內湊撥大營糧臺銀三十五萬兩其餘十五萬兩分給鎮江等各營僅得敷衍度歲此後需餉尙多不可不認真籌畫設法辦理除截留漕米糶價儘數撥給外所有地丁及江海關稅並海運經費抽釐各項著該督撫一併湊解無誤要需至蘇省年歲荒歉正款無多不得不剴切勸捐借資民力該省勸捐本係各府紳董承辦民情尙屬相安上年和春另派谷韞琛等五人往蘇松二府勸捐恐本處紳董轉得藉口卸肩而伊等人地生疏究屬隔膜已諭和春毋庸派辦以後仍著該督撫責成該地方官會同本地紳董妥爲勸諭接濟和春大營江蘇藩司何俊是否年老難勝繁劇之任當此錢糧支絀之時必資精明練達之員方足以資籌畫而裕經費著怡良趙德轍查明該藩司如不勝任卽一面具奏一面撤任毋至貽誤將此由六百里諭令知之○諭本日據文俊奏

江西軍餉支絀請飭四川協濟一摺江西勦賊正當喫緊四川見  
係完善之區雖調撥軍餉不僅一處自應竭力籌撥以顧大局著  
吳振械設法籌款每月撥解江西餉銀數萬兩以資接濟毋誤要  
需又據樂斌奏請飭川省變糶常平倉穀共有一百二十餘萬石  
若按照例價每石糶銀五錢五分計可得銀六十餘萬兩所糶價  
銀解部設局收買米石見在京師米價昂貴倉儲短絀兵民粒食  
維艱自應寬爲籌備惟此項米石囤積日久恐不免有黴變之虞  
著卽迅速查明趕緊設法籌糶儘爲數不敷並著於濟社二倉內  
存穀糶變湊足五六十萬兩之數派員解赴京師以資收買將此  
由四百里諭令知之○文俊奏查饒州北界彭澤都昌東鄰祁門  
建德逆匪環伺防兵又單上年十二月間鄂省敗匪萬餘自都昌  
闌入鄱陽之泥灣等處經都司畢金科等往勦該逆竄往浮梁縣

景德鎮並有安徽敗匪七八千由祁門亦竄至浮梁縣署知縣楊  
錚帶勇堵剿先勝後敗逆匪遂先後由樂平萬年安仁等縣竄入  
撫州餘尙占踞景德鎮正月初二日畢金科因浮梁縣約會夾攻  
於初四日抵鎮而浮梁勇尙未齊畢金科卽率本營進剿分派千  
總李飛龍等由各巷口衝入自帶哨官李克封等由正街進詎伏  
賊四起鏖戰逾時竟致潰敗畢金科力竭陣亡饒郡大震駐防各  
勇潰散餘俱移紮角山前十八日署饒州府知府馮詢移請駐防  
餘千之都司林保赴郡協剿二十三日千總陳開榜尋獲畢金科  
屍身正收殮間聞大股賊匪由四十里街來撲郡城林保卽帶勇  
迎剿賊匪已自北門撲入林保督隊堵截砍倒執黃旗賊目二名  
直入賊陣左右衝突殲斃十餘名賊匪四面合圍林保身受三傷  
幸哨官時連科等馳至合力抵禦殺賊數十水師礮船開礮擊斃

無數賊敗退屯聚油墩一帶此皖鄆敗匪分竄各屬情形也廣信府屬之貴溪縣毗連撫建饒州調撥知縣李元度帶勇守禦撫州賊匪屢擾貴溪縣之上清廬潭及安仁縣之鄧家埠均經李元度擊退正月二十一二等日另股賊匪四五千復由景德鎮竄過萬年將赴撫郡李元度卽飭彭斯舉等帶隊於二十三日赴安仁截剿逆匪見官兵已至旋即折回萬年二十四日竄擾貴溪之百丈嶺一帶李元度飛調彭斯舉等同貴一面派吳修敬等帶隊放哨丁家坊之賊卽退回三板橋二十五日該逆改竄弋陽縣彭斯舉等督兵進剿弋陽縣知縣善普率勇嚮導路遇放哨賊六七十人悉爲我軍所殺附城屋內有賊百餘復圍殺大半黃兆霖等乘勢直衝入城遇賊卽殺逆黨數千三面包出黃兆霖爲火彈燒傷與彭斯舉等突圍而出是日三板橋續到賊二千餘李元度隨將

彭斯舉等調回靖禦該逆亦併歸弋陽彭斯舉等跟蹤追擊善普及同城文武亦率團來會其先到弋陽之賊已搭浮橋過河後到一股尙踞弋邑彭斯舉等自北門進攻賊正過河截殺七八十人賊爭趨浮橋擁擠落水者不少對河賊黨情急將浮橋拆斷未經過河之賊復被我軍殲斃多名餘賊竄往黃土港而去當將縣城收復二月初一日該逆竄擾河口鎮經署同知孫家鐸等於三更時進剿該逆不知我軍多寡卽望鉛山奔竄沿途追殺十七名初三日該逆冒雨來撲鉛山北門署知縣陳汝楨等開礮堵禦不意西門城牆雨後鬆塌逆匪卽由缺口衝入數十人縱火焚毀衙署陳汝楨等趕往撲救值外委李化龍自河口趕到逆匪疑爲援軍遂卽退竄約殺賊四十餘人該逆旋竄鉛山弋陽邊界之吳坊一帶並窺伺閩省之雲際關被該處兵勇擊回見俱竄往建昌而景

鎮地方於初九日又到股匪數千擾及貴溪萬年餘干一帶此信郡各屬被擾情形也道員劉于濤上年駐兵樟樹十二月初二日派蔡康業等陸勇及康國器等水師擊沈賊划淹斃賊匪二十餘名初三日臨江之賊來犯亦爲擊走復探得三溪館地方有賊千餘營盤四座劉于濤親率兵勇進剿殺賊焚壘連日復率水師及平江勇攻破銅羅地方賊營三座斃賊五百餘人三十日臨郡賊匪來撲我營劉于濤令何堯臣等分路迎敵平江勇楊三保首砍執黃旗賊一名賊勢稍卻各軍馳剿該逆自相踐踏死傷甚多直追至臨江城下而還正月十二日復派平江勇數百名赴蛟湖接仗失利幸經水師截住賊不敢追十九日探聞撫州賊匪合皖鄂賊約數萬人赴援瑞臨劉于濤卽派李逢春等各帶礮船赴新淦截擊逆匪擄得民船百餘號欲渡我軍開礮轟擊賊卽紛紛上岸



追逐三四里將被擒民船奪回二十一日離樟樹十五里之香溪  
地方有賊數千劉于潯乘其遠來立派羅玉祥等疾馳進剿該逆  
不戰而遁追殺數十人是日又有股匪數千竄撲豐城劉于潯卽  
帶領礮船助剿鏖戰二時賊始敗退二十三至二十七等日逆匪  
數千竄至距樟樹二十里之潭埠地方屢次竄撲均經水陸各軍  
先後擊敗二月初三日探知黃竹巷地方有賊數千劉于潯卽令  
水陸各軍進剿初五至十四等日擊敗來援沙湖股匪攻破蕭公  
廟賊營遂併力齊攻香溪賊眾膽落盡望新淦竄去此樟樹豐城  
疊次防剿情形也補用道劉長佑知府蕭啟江克復袁州後劉長  
佑收復新喻進攻臨江之西蕭啟江先剿上高進攻臨江之北蕭  
啟江行抵上高縣之漢塘地方紮營賊分股來撲蕭啟江開營縱  
擊敗之進攻上高縣城該逆鼠竄收復城池搜剿官盤地方焚毀

僞監軍傅家淦巢穴進攻陰岡嶺各路獲勝斃賊數百名落水溺斃者無算適聞臨江有賊數萬分萬餘至陰岡嶺撲營湖坊及劉公廟各來大股勢如潮湧蕭啟江令蕭啟淮等分投迎剿鏖戰四時殺賊六百餘人生擒數十名餘匪敗竄二月初八日臨江逆匪二萬復分路來犯蕭啟江督同各將弁迎擊苦戰竟日殺賊多名餘賊敗匿彭家村道員劉長佑一軍敗賊於陽岡探聞撫州來賊四五千與臨郡之賊三四千廝聚羅坊劉長佑率隊往剿賊列陣於羅坊前後不下萬餘人劉長佑派各營前後鈔剿劉坤一等匹馬衝突各勇奮力直前再接再厲街後之賊先敗街前之賊隨亦沿河潰走追殺二十餘里共計斃匪四百餘名生擒十五名是日卽紮營羅坊並調畱防袁郡都司黃三清移守新喻本年正月初間移營太坪地方俟蕭啟江兵至會攻郡垣詎意臨郡賊匪數萬

撲營劉長佑正在抵禦伏賊四五千自後路突起以致各營全陷  
劉長佑退回新喻該逆自大坪撲營後欲悉眾來犯陰岡嶺蕭啟  
江一軍甚爲喫重瑞州大營已抽撥湘寶等勇一千五百名策應  
此分攻臨江劉長佑失利退回情形也臣查劉長佑一軍挫衄退  
回蕭啟江駐紮陰岡嶺勢甚岌岌瑞州不得不分兵救應吉安又  
添援賊萬餘我軍苦戰實甚急宜撥兵圍攻撫建擒賊所必救既  
可分臨吉賊勢亦可保全廣信要區而本省急切無兵可撥前經  
西安將軍福興會臣奏請調外省精兵惟有靜候諭旨遵辦都司  
畢金科身經百戰驍勇超羣此次深入重地被害甚慘懇請飭部  
照遊擊陣亡例從優議卹其餘員弁應請分別辦理奏入予畢金  
科祭葬世職如遊擊例訓導沈其秀等祭葬世職○癸酉諭內閣  
怡良趙德輿奏遵旨籌辦團練一摺前因文慶等奏請實行團練

疊經降旨諭令各督撫體察地方情形斟酌辦理茲據該督等奏  
審度形勢分別派員管理籌辦尙屬周妥江蘇見在逼近賊氛團  
練尤關緊要該官紳等果能實心經理既可保衛鄉閭尤可助剿  
賊匪除淮安徐州二府由該督等咨明邵燦庚長責成徐州道王  
夢齡辦理外所有裏下河各州縣及通海二州屬卽著署兩淮鹽  
運使郭沛霖督辦江南府屬之六合江浦二縣著已革道溫紹原  
督辦上江句容等縣及揚州府屬之江甘儀徵等縣著各該管知  
府督辦常州鎮江二府屬著常鎮道喬松年會同已革臬司查文  
經督辦蘇松太一帶著該省臬司督辦凡有見任各官經該督撫  
派令督辦者均加督辦團練銜其有由司督辦者該管之道府州  
作爲協理由委員及道員督辦者該管知府作爲協理由知府督  
辦者該管同知作爲協理均著加協理團練銜以專責成一俟軍

務完竣卽行撤銷該員等務當督飭州縣各官遴選公正紳耆會同經理查照原奏章程隨時考覈嚴定賞罰經費則民捐民辦勿許科勒丁壯則各保各鄉免其徵調以副朕除暴安良至意○諭軍機大臣等自粵匪東竄以來江蘇省籌解大營軍餉皆取給於地丁關稅並由各省協撥之款從無貽誤見因荒歉錢糧蠲緩居多關稅未能暢旺各省撥款又因用兵之處較多以致解數寥寥見據報春怡等先後奏到復稱江南大營兵餉積欠四月有餘兵丁時有鼓譟之事雖經降旨嚴催廣東等省將欠解各款趕緊起解恐一時未能卽到兵勇嗷嗷待餉豈能枵腹荷戈若再遲延大局將不可問因思用兵禦寇原以保全黎庶且各省捐輸軍餉朕無不立沛恩施惟民力不齊爲數零星又無濟於大勢咸豐四年間陝西巡撫王慶雲曾有捐借兼行之舉頗著成效不獨江蘇

省可以照辦卽浙省籌濟院南江西江南等處餉需亦屬支絀如  
能查照辦理除本省供支外亦可協濟江南軍餉著怡良趙德轍  
晏端書督同省垣紳士並派委委員分赴各府州縣會同各該紳  
士查明上戶若干開報該督撫卽責成公正紳士婉委勸導隨時  
請獎其有爲數較多自一萬數萬以至十萬兩者自應分別差等  
逾格施恩或賞給鹽運使銜或賞給副將銜或加銜之外另賞花  
翎以賞給舉人一體會試均准該督撫等酌量請旨以期踴躍其  
有刀可多捐而不願請獎者卽由該督撫等飭由藩司按數給與  
借咨印帖自咸豐八年起分年給還作正開銷仍按照銀數多寡  
分別建坊給扁以示優獎所派委員紳士務擇素行廉正才情幹  
練者分投勸辦萬不准有抑勒侵吞致滋流弊中戶以下所有見  
行捐輸抽釐等項仍著照常辦理毋庸另勸捐借以免煩苛地方

官吏等儻敢將未經開報各戶藉端需索卽著嚴參懲辦該督撫等務當各就地方情形詳加體察酌量辦理以實軍需當此用兵之際凡食毛踐土之倫各具天良必有踊躍出貲同仇敵愾者儻能積有成數卽撥江南大營以資接濟庶兵無匱乏而於民生亦不至擾累將此由四百里各諭令知之○諭怡良趙德輿奏軍餉來源已竭請飭鄰省互籌協濟等語江南軍餉每月需銀四十餘萬兩本省所出每月不過二十餘萬兩見在句容大營及水陸各營欠撥過多兵勇赴糧臺喧鬧若不急籌協濟恐餉竭兵譁全局瓦解浙江與蘇常等府壤地相接卽休戚相關似此窘迫情形必應於無可籌撥之中設法源源接濟藉以支持大局除昨據晏端書奏撥銀一萬兩解赴江南大營外著該撫仍遵前議自本年三月起按月協濟卽不能如六萬兩之數或四五萬兩源源解往藉

以安定軍心不得以無款可籌空言塞責將此由五百里諭令知之○甲戌諭內閣胡林翼奏官兵生擒匪首襄樊肅清一摺襄陽匪徒高二先等被官軍疊次擊敗竄匿張家集等地方三月初五日候補道唐訓方參領舒保督兵乘雪夜行四面進攻初六日遇賊於白家集被擊反走官兵分五路星夜追剿於郭家岡地方將匪首高二先等生擒正法餘匪殲斃淨盡襄樊漸就肅清此股匪徒自上年九月滋事襄脅甚眾襄樊文武力守危城胡林翼派往各員勦辦迅速均屬著有微勞所有出力員弁及協剿之紳團等著准其擇尤保奏○諭軍機大臣等本日據袁甲三奏正陽賊勢稍鬆擬先清北路再行南下惟軍情緩急靡常進退難以豫定亳州見乏得力將領請飭英桂於道員以上選派一員來亳駐紮各等語袁甲三見雖駐紮亳州俟北路官軍得手後卽須統兵前進



與勝保一軍聲勢聯絡而亳州東北一帶伏莽尙多必須明幹大員駐紮方不至顧此失彼惟河南省道員以上文員每多未經行陣深恐難期得力著英桂勝保於見在帶兵之副將參將等官中擇其堪資統領者卽行選派一員馳赴亳州軍營如袁甲三統兵南下卽可責令該員實力防剿以遏歸亳北路之衝將此由五百里諭令知之○丙子諭軍機大臣等蔣霖遠奏威甯州漢回構釁分別剿撫一摺該州爲回漢夷民錯處之地此次起釁本因滇省漢民報復回仇致宣威之回將威甯所屬村房燒毀境內回匪四起竟至圍撲州署知州周守正雖經撤任而匪勢未衰漢夷居民終懷疑忌驟議調兵固恐邀結滇回釀成巨變遽行議撫亦恐漢夷民心不服且黨與旣多良莠不一未必輸誠聽命見在滇省辦理漢回其誤卽在專主招撫以致回匪旣不畏威漢民亦不懷德

該州同入雜處辦理不得其平難免藉端生事該撫業經酌調官兵如果該回民等悔罪投誠縛送首逆准予自新儻仍執迷不悟必當懾以兵威不可遷就了事無論回漢夷人總須論其曲直不得稍有偏袒方足折服其心仍一面剴切曉諭一面知照恒春等加意嚴防毋令勾結延蔓將此由六百里諭令知之○己卯諭內閣福濟奏攻勦壽州竄賊獲勝並攻毀枸杞園賊營等語逆賊自壽州解圍後屯聚三十里鋪戈家店一帶並於正陽迤東之枸杞園紫營三座經署道金光飭等帶兵於雙橋地方接戰斃賊甚多練總孫家熾等各帶練兵三千名在迤南橫擊我軍乘勢急攻斃賊二千餘名該署道復於行近枸杞園地方將兵勇馬匹分路圍擊立將賊營三座奪毀追殺十餘里斃賊五六百名餘賊敗竄仍著福濟飭令該署道將竄賊分投勦擊悉數殲除俾自壽州至正

陽一帶得以迅就肅清○諭福濟奏兵勇索餉滋鬧遺失關防自請嚴議一摺廬州大營湖南兵及楚勇廣勇等因該撫巡視城垣輒敢藉索餉爲詞肆行滋鬧以致該撫關防失去實屬目無法紀著福濟卽將該滋事兵勇查明從嚴懲辦並將不能彈壓之帶兵各員據實參辦以示懲儆福濟自請嚴議之處著加恩改爲交部議處並著禮部將安徽巡撫關防卽行鑄造頒給以昭信守○諭福濟奏藩司因擠跌損傷懇請開缺一摺安徽布政使畢承昭因山東兵丁索餉出堂彈壓以致人多擠跌腰骨損傷著准其開缺回籍調理所有約束不嚴之總兵嵩瑞遊擊施溥守備恩清胡運河扎拉豐阿業普崇額衛守備張際元均著摘去翎頂以示懲儆○諭軍機大臣等福濟奏皖營兵勇缺餉請飭於江南釐捐項下酌提撥解等語皖省旱荒米貴無款可籌致各營兵勇索餉滋鬧

勢甚危急所奏自係實情惟江南大營近據和春奏到因欠餉多月兵勇亦有鼓譟之事是江南與廬州情形同一緊迫福濟所稱江南釐金已收銀二百餘萬兩不知隨收隨放豈有鉅款存留至廬州軍餉本年各省節次報解者山西已有十萬兩陝西已有五萬兩河南九千餘兩浙江於本月奏到解銀二萬兩江蘇於本日奏到解銀三萬兩爲數已屬不少其或因道路梗塞日久未達福濟惟當派兵疏通設法迎提前進以濟急需勿使已經起解之餉阻滯附近地方自誤餉需再前據庚長奏籌米二千石解赴臨淮秦定三見在帶兵赴臨淮一帶原爲疏通餉道起見如果淮河一帶並無梗阻則此項米石無難運到又本日英桂奏河南解赴廬州米麥六千石尙在阜陽因無路可通不能前進福濟當設法迎提聊資接濟毋得一籌莫展以致坐困安徽藩司已簡放李孟羣

該員見由湖北帶兵前來援應廬州諒計日可到矣將此由六百里加緊諭令知之○諭英桂勝保奏剿擒正當喫緊粵逆又圖北竄請飭派兵助剿等語頴上縣城當歸陳穎毫之衝勝保既親督前往諒能得力所請添兵之處九江郡城尙未克復楚軍何能分半赴豫況已撥往江西廣信並李孟羣帶兵一千五百名援應廬州武漢存兵已屬無多本日仍諭令官文胡林翼如襄樊已就肅清卽於該處官兵內酌撥一千名馳赴英桂等軍營調遣未知能否應付並遲速如何勝保前奏截畱經過河南之陝甘官兵究竟是否到營連穆騰阿馬隊並見在暫畱之察哈爾馬隊及山東官兵等爲數已不甚單自應先籌迎剿以遏賊鋒不可專待添兵致令賊氛愈熾至直隸防兵據雙銳奏報已於二月二十九日由畱智廟啟程史榮椿一軍據邵燦等奏報已赴亳州會同袁甲三堵

勦由該漕督等另派吉林餘兵大同馬隊各二百名赴潁州助勦英桂勝保卽當迅速迎提以資攻勦至李孟羣由楚赴皖本爲廬州喫緊起見本日已將該員改放安徽布政使尤應趕緊赴任儻此項兵勇路經河南地方該撫等不得率請截畱致滋貽誤將此由六百里諭令知之○諭英桂勝保奏捻匪勾結粵逆竄擾潁上勢甚危急光州亦形喫重該撫所帶兵勇不敷堵勦請於楚省酌撥馬步勁兵三四千名赴豫援應等語見在湖北襄樊一帶雖漸就肅清而巴揚阿一軍尙須在彼彈壓前後諭令酌量抽調應援廬州廣信等處其在九江者尙未克復城池自難分撥惟是河南安徽交界捻匪與粵逆勾連賊眾兵單係屬實情若不籌兵接濟深恐滋蔓難圖見在楚省情形究爲稍緩著宮文胡林翼妥爲籌畫如襄樊一路已就肅清無須重兵彈壓卽於此項官兵內湊撥

一千名派委得力將弁管帶前赴河南交英桂勝保調遣以資助  
勦將此由六百里諭令知之○以李孟羣爲安徽布政使羅遵殿  
爲湖北按察使由兩淮鹽運使遷○予安徽陣亡知縣金寶樹等祭葬世

職○辛巳諭內閣葉名琛奏廣東省員弁越境會勦匪徒埽平賊  
巢一摺廣西佃匪占踞橫州永淳縣地方各村疊次圍撲城池擾  
及廣東廉州府屬之合浦靈山等處經葉名琛派令高廉道蔡徵  
藩署廉州府知府沈保頤會同參將廖達章遊擊秦鳳山等督兵  
越境進勦於上年正月至二月先後攻破匪巢六十餘處將占踞  
之二百餘村全行收復擊獲匪徒埽平巢穴辦理尙屬奮勉所有  
在事出力官紳及前次會勦南甯府鬱林州等處匪徒出力各員  
弁均著葉名琛查明奏請獎勵○諭葉名琛奏廣甯懷集兩縣勦  
匪出力請保出力員弁一摺兩廣交界之廣甯懷集二縣壤地毗

連匪徒易於藏匿官軍克復廣甯縣城後匪徒數千餘人勾結土匪滋擾自五年八月至本年四月經廣東署督標中營都司鍾文彩及廣甯縣知縣朱甸霖署廣西懷集縣知縣元慶等督率兩省文武員弁兵勇會合紳團先後將妙村各路匪徒首夥殲除淨盡賊巢概行焚毀奪獲槍礮器械鉛藥不計其數地方一律肅清該官紳等均能不分畛域認真勦捕辦理尙屬安速所有此次出力文武紳團兵勇著葉名琛查明與前次克復廣甯縣城出力員弁併案保奏候朕施恩○葉名琛奏英吉利船隻自退出省河後復經官兵連旬擊勦疊次焚燒船隻兩旬之久尙無動靜聞該國以咆吟巴夏禮不應與中國啟費另派人來粵定議虛實尙未可定奏入上諭以先定主見爲將來定議地步儻此次派來之人尙講情理亦須以禮相接勿使再有藉口俾得自爲轉圜○以廣西



柳州府城被賊竄陷提督惠慶解任來京下部嚴議巡撫勞崇光  
下部議處○是月減安徽亳州等九州縣上年被災額賦十分之  
一賑恤河南南陽縣被旱災民

東華續錄

咸豐七十

臣王先謙敬編

臣陶澐宣恭校

夏四月壬午朔予四川被戕州同崑秀祭葬世職○甲申諭內閣  
恆春奏分剿各路回夷獲勝情形一摺雲南迤西回匪經官兵追  
剿將積匪蘇發貴等擒獲正法見在師羅各營俱各誠心輸服江  
外肅清已革副將陳得功前因妄殺冒功發往新疆不准逗畱茲  
雖剿辦尙知愧奮惟該員獲罪較重所請免其發遣之處仍不准  
行者俟續有勞績再行奏請○諭軍機大臣等據德勒克多爾濟  
等奏俄羅斯欲遣使來京商辦密事一摺復據理藩院奏俄羅斯  
達喇嘛巴拉第具呈亦稱該國上司論文欲差大臣進京等語著  
該大臣等明白曉諭告以中國與爾國交好多年從無差大臣前

來商辦要件之事本國但知遵守舊章永遠和好今爾國達喇嘛  
巴拉第在京呈稱爾國因英國有窺伺占踞之心欲差大臣來商  
機密事件已由理藩院具奏大皇帝念爾國道路遙遠向無差大  
臣進京之事已諭理藩院行知該國照例但送學生進京毋庸特  
派大臣前來至爾國既誠心交好從前止有恰克圖一處通商今  
大皇帝又准在伊犁塔爾巴哈台兩處通商相待可謂優厚見惟  
塔爾巴哈台焚燒夷圈一事應行查辦爾國既敦和好之情卽當  
派員會同該大臣等秉公辦理速行了結以便照舊通商無傷和  
好此外並無應議事件毋庸特派大臣前來如此明白曉諭不可  
調兵防備故事張皇所有理藩院行薩納特文底鈔給閱看將此  
諭令知之○予雲南被戕知縣周錫桐等祭葬世職○乙酉諭軍  
機大臣等樂斌奏湖北撤回陝甘官兵未能調赴勝保軍營等語

陝西撫標提標各兵業已撤回歸伍其肅州等協官兵亦已回抵  
隆德距各原營不遠且該兵丁見多患病兼在湖北繳出器械自  
應分別收伍未能調赴河南惟大股捻匪經勝保等擊敗後復勾  
結粵匪竄擾賴上光州一帶情形亦甚喫重英桂等所帶兵勇不  
敷堵剿亟應設法湊撥以遏賊氛前據曾望顏奏因嵩縣肅清截  
止甯夏鎮兵四百名令其毋庸來陝此項兵丁如果得力堪以出  
調卽著樂斌飭令前赴河南交英桂勝保調遣將此由五百里諭  
令知之○丙戌官文胡林翼奏查小池口下數十里與江西湖口  
對峙之段窯楓樹坳獨山鎮等處先後添築賊壘數十座外浚深  
濠藉爲小池口屏蔽以拒我師三月初九日江甯將軍都興阿先  
派營總薩林等帶馬隊二百名會同石清吉步隊繞道馳赴小池  
口東路埋伏續派翼長多隆阿率領馬步各軍進剿段窯都興阿

自領總管巴依爾呼蘭副將鮑超駐小池口之西賊分三路出撲經鮑超等擊退其一股往援段黨被薩林等伏兵前後掩殺斃賊無數維時多隆阿甫至段黨見賊壘已成該逆又出眾數千列陣抗拒經營總密雅明阿等射斃騎馬賊目數名餘逆敗退立將賊壘十餘座毀平追殺至八里江斃賊千數百名溺死無算十三日多隆阿等由黃梅馳至楓樹坳賊匪踞山扼險築壘數里知我軍至賊又分三路出拒各二三千人多隆阿亦分三路應之同副將王國才由中路進巴依爾呼蘭同提督孔廣順等由南路進祿昌等由北路直前逆眾抵死抗拒王國才等復分兵繞出山南賊壘之後擊斃守壘悍賊多名賊陣大亂紛紛潰竄巴依爾呼蘭等分路掩殺生擒四十餘名追殺十餘里斬馘三千數百名時已日暮多隆阿卽傳令乘勝進剿獨山鎮踞賊遂於十五日四鼓捲甲馳

赴至獨山鎮之陶岸嶺地方賊匪沿山築壘七大座外環深溝護以樹椿竹籬多隆阿因仰攻不易遂令孔廣順等以輕騎誘賊出巢而令馬步各隊分伏要隘值月明如晝該逆見我軍隊伍星散賊眾出壘迎敵我軍馬隊縱橫衝殺賊勢披靡而多隆阿等又已潛令開化勇越濠拔椿躍登賊壘齊拋火彈焚燒賊篷數百火光燭天賊眾狂奔我軍踏平賊壘奮力圍剿屍橫徧地又追殺三十餘里斃賊五千餘名先後溺水死者千餘名生擒數百名洵足以大挫兇鋒 上諭內閣此次剿平小池口附近賊壘追至宿松先後斬擒賊首萬餘級辦理甚屬得手著官文等卽飭帶兵各員乘茲銳氣迅克小池口並九江府城以遏賊衝所有出力員弁兵勇著官文胡林翼會同查明並歷次獲勝出力人員彙案保奏候朕施恩○諭軍機大臣等前因湖北軍餉缺乏諭王慶雲等每月撥

解銀數萬兩俾資支放茲據胡林翼奏餉欠兵饑請於山西藩庫河東鹽庫速籌銀三十萬兩等語山西協濟各路兵餉所撥甚多未必有此鉅款惟見在都興阿進剿皖賊四次奪壘十一座楊載福水師正擬會攻湖口便圖安慶李續賓步隊亦素稱得力此三軍勁旅不可多得若聽其缺餉饑疲軍威不振實於大局有妨該撫請撥三十萬兩尙不過稍清舊欠以爲進戰地步著王慶雲於按月協濟外竭力設法酌量籌撥雖不能如所請之數總須先撥一二十萬俾資接濟庶不至如杯水車薪無益於事著卽妥籌速奏將此由五百里諭令知之○丁亥諭軍機大臣等譚廷襄奏酌擬推行大錢及設局加鑄鐵錢一摺直隸行使大錢雖稱二成搭放民間竟有以制錢九百二十文作錢一千者致大錢日形壅滯該署督奏稱如果各州縣嚴實通搭二成大錢自必日見流通所

見諒有把握卽著照所擬試辦各屬如有陽奉陰違者著卽督同  
司道等官嚴行糾察毋許稍有歧異參差之弊至徵收錢糧民間  
如一時無從購買大錢勢不能不准其暫以制錢抵交方免抑勒  
病民該署督摺內所稱設局經理鈔票開鑄鼓鑄錢文並片內所  
稱搭收錢文按月用印票呈報備查之處均著照所擬妥爲籌辦  
總期實力奉行不至有名無實將此諭令知之○諭王慶雲奏請  
更換調豫官兵以資防守一摺據稱河南省前調山西太原鎮等  
營官兵一千名經英桂酌留五百名派防永城見在晉省南路辦  
防兵力不敷若將別鎮兵丁調往自不如本鎮之兵熟悉地利較  
可得力擬於大同鎮屬調兵五百名赴豫將前調官兵五百名換  
回等語山西省南路防堵旣需本鎮官兵自應酌量調換藉資得  
力著王慶雲卽將大同鎮兵五百名剋日調齊派委妥員管理星



馳赴豫一俟此項官兵到防所有太原等鎮兵五百名卽著英桂飭令原帶兵官珠爾杭阿管帶回晉將此由四百里各諭令知之○諭王懿德等奏逆匪闖入閩疆邵武府光澤縣相繼失守覓擬將署衢州鎮總兵饒廷選統帶之福建兵勇一千名由玉山調回建甯並咨調廣東兵二千名赴閩會剿仍請旨飭催等語江西大股賊匪由光澤竄陷邵武勢極剽悍亟應調兵堵禦該省與粵東接壤赴援較易所有王懿德咨調兵二千名著葉名琛斟酌情形如數調撥派得力大員統帶星馳赴閩交王懿德調遣其應需口糧卽由廣東源源接濟並著咨行沿途經過地方毋許截留貽誤饒廷選一軍前因廣饒賊氛甚熾經晏端書調赴玉山防堵見王懿德擬將此項兵勇調回建甯固爲軍務緊急起見惟玉山爲全浙門戶堵禦亦甚緊要著晏端書酌量緩急如玉山防務尙有安

員可以更替自應卽令饒廷選回閩助剿儻因饒廷選久駐該處  
驟難更換浙省見有何項兵勇可調卽著晏端書速爲調撥派委  
妥員管帶赴閩其王懿德另摺所稱已調提督鍾寶三帶溫台兵  
五百名赴閩之處並著晏端書催令迅速啟程毋稍遲緩延建等  
處防兵一聞粵匪入境輒致驚潰旣據王懿德聲稱卽日出省前  
赴上游著卽將邵武等城迅籌克復毋令日久滋蔓將此由五百  
里各諭令知之○以福建邵武光澤府縣二城被賊竄陷革副將  
張從龍參將琳濶職並逮問○予江西傷亡典史王科等祭葬世  
職○戊子諭軍機大臣等前諭提督秦定三赴和春軍營助剿本  
日復諭令統帶所部黔兵眞勝勇一千二百名卽日由臨興啟程  
惟廬州防剿正在喫緊秦定三帶去兵勇自應於江南軍營酌撥  
抵還除前據和春奏撥兵八百餘名派委協領玉崑等帶赴廬州

外著再酌撥兵勇數百名共湊足一千二百名以抵還秦定三帶  
去兵數並催玉崑等先行迅速赴廬續撥之兵卽飭速往以資援  
應將此由六百里諭令知之○諭福濟等奏遣散老弱兵丁請另  
行補足換防一摺安徽原調陝甘提屬營兵五百名今僅存一百  
九十餘名再汰老弱所存不過一百五十名該撫等請飭陝甘挑  
補三百五十名前往廬州以待原撥五百名之數自爲攻剿需兵  
起見見在陝甘調赴他省之兵已屬不少昨復諭令將甯夏鎮兵  
四百名調赴河南此次福濟等所請能否如數挑補著樂斌酌量  
情形不必拘定原調營分但有兵力精壯可用者卽派妥員管帶  
前赴廬州交福濟調遣將此由五百里諭令知之○諭寄諭安徽  
巡撫福濟廬州存營兵丁旣多老弱自應酌量撤遣以收實用惟  
所請各由原營照數補足一節如固原提屬須挑補兵三百五十

名尙足以成一隊已諭令樂斌酌量挑撥其直隸熱河密雲山東湖南等處汰缺兵數未據該撫奏明以每百名裁撤二十名計之應補之數當亦無多若每處湊撥百餘名或數十名徒多徵調之煩無補征剿之用況見在北省幾無可調之兵著卽知照各處停其調兵補數以省勞費新授安徽藩司李孟羣已由湖北帶兵二千五百名前赴廬州得此大隊赴援較之零星湊補更爲得力秦定三駐紮臨淮原爲疏通餉道旣據該撫聲稱見駐梁縣餉道已無虞梗阻著傳諭該提督卽帶貴州兵及眞勝勇一千二百名遵旨馳赴丹陽和春軍營助剿其漢中兵及吉林馬隊仍畱於臨淮以資扼守至和春營中前已派兵八百名馳赴廬州本日復諭該大臣酌量挑撥與秦定三帶往兵數相當惟江南兵力亦非有餘能否添派諒和春必能斟酌妥辦也將此由六百里諭令知之○

己丑諭軍機大臣等英桂勝保奏柳溝集剿賊獲勝並調邱聯恩回防光息一摺捻匪大股見聚柳溝老巢勝保赴援潁上之路爲其中阻自應急籌攻克以通南北聲援光息一帶焚搶之匪據稱係李兆受一股則其中難保無粵匪在內該撫等所調邱聯恩官兵及蒯賀蓀之勇是否足資堵禦尤不可不妥籌兼顧至察哈爾官兵旣不得力無論有馬無馬著全行撤遣飭令歸伍其調赴廬州之五百名亦著全數遣回此項官兵啟程毋庸令其乘騎馬匹卽由地方官酌備車輛沿途遞送其見存馬匹概畱軍營以資攻剿黑龍江官兵徵調已多無可再調本日已諭德興阿等將前此撥赴揚州之黑龍江餘丁五百名飭令赴豫著英桂等卽行催提並將邵燦等派赴潁州之吉林餘丁二百名一併催提到營以符該撫等請調之數可期得力將此由六百里諭令知之○諭前據

德興阿等奏營總佛爾恭阿所帶黑龍江餘丁五百名派令駐紮儀徵樸樹灣歸參領富明阿管領本日據英桂勝保奏見在偪攻柳溝賊巢察哈爾馬隊不能得力請分別撤回歸伍添調黑龍江餘丁六百名來營助剿等語察哈爾馬隊既不得力業已諭令全數撤回惟黑龍江餘丁屢據該將軍覆稱無可再調且程途寫遠見在剿捻正當喫緊豈能久待著德興阿等卽將駐紮樸樹灣之黑龍江餘丁五百名派員管帶迅速前赴勝保軍營以資調遣其樸樹灣一帶防堵緊要並著德興阿等酌量妥籌布置添兵前往扼守毋稍疏懈將此由六百里諭令知之○浙江巡撫晏端書奏江右股匪竄擾閩省浙東一帶防剿喫緊請將署衢州總兵官饒廷選仍畱署任辦理防堵得旨近有寄諭令汝酌度今觀此奏饒廷選實難赴閩著仍畱防所○壬辰諭軍機大臣等有人奏湖南

省各廳州縣捐助軍餉自數萬至數十萬不等未經按照定章奏請加廣學額中額民間幾疑捐輸獎敘之典爲虛文請飭覈實彙奏等語各該省捐助軍餉其按照舊章經督撫請加中額學額者無不立沛恩施湖南以一省防剿數省並籌應兵餉五載以來民間捐輸不少自應及早查明彙奏請獎著駱秉章卽將該省各廳州縣捐銀並合省共捐銀數目已未收銀若干查明覈奏將此由四百里諭令知之○癸巳諭軍機大臣等文俊奏江西軍餉不繼請飭四川道員張思鏜勸諭在川貿易之江西商人捐輸接濟一招江西軍務需餉浩繁經費不繼自係實在情形惟江西商人既託業川省所有川省捐輸該商等自必在列勢難因原籍需餉重令出賃從前派員赴鄰省勸捐亦經辦有成案惟以有餘省分協濟不足之區原不拘定因何省需餉專勸該省商人致分畛域卽

如張思鏜原籍江西自必情殷桑梓四川總督原可委令辦捐江西巡撫亦可擇公正紳士或明幹委員前往會辦著吳振械清齡體察情形會商辦理不得專勸江西在川貿易之人指捐本省軍餉轉涉苛細也將此由五百里各諭令知之○怡良以病免命何桂清以二品頂帶署兩江總督

前任浙江巡撫

未到任前以趙德轍暫行

兼署○甲午常雩祀

天於

園丘

○尊藏

宣宗成皇帝實錄

聖訓於

皇史宬

○乙未恭懸

幕東陵

御書扁額○諭軍

機大臣等蔣霽遠奏黎平府屬之永從縣城錦屏汛城先後失守請飭催湖南兵勇進援等語湖南援剿貴州兵勇前據駱秉章奏調二千二百餘名派萬年新等統帶於上年十一月下旬先後行抵靖州何以遲未到黔見在永從縣城錦屏汛城先後失守該省距黎平爲遠鞭長莫及自應迅催此項兵勇趕緊赴援著駱秉章



速飭萬年新等剋日由靖州進剿並飭兆琛所帶之勇迅速啟程毋得遷延貽誤將此由五百里諭令知之○予貴州陣亡遊擊何觀元等殉難同知邵鴻儒等祭葬世職○丙申諭軍機大臣等德興阿等奏瓜州大獲勝仗並水陸攻剿情形一摺此次進攻瓜州賊壘旬日之間俘斬甚多自應乘此銳氣亟圖攻克惟江浦爲南北要衝自二月十九等日該逆出巢被擊後迄今將近兩月如何設法籌攻該大臣等未經奏及已革候補道溫紹原在軍營數年募勇助剿頗資得力前經德興阿因其干預保舉奏請革職原屬咎由自取見在該革員仍畱六合防堵若責令帶勇隨同官兵迅圖克復江浦許其立功自效以贖前愆該革員諒必感激思奮當此禦侮需才之際正宜賞罰並行以收指臂之助也瓜州賊勢日蹙當有克復之機見在金陵逆首以句容溧水牽掣我軍坐守金

陵毫無顧忌得以分兵四出擾及徽廬內窺東壩使我防不勝防  
儻能先克瓜州則水師即可進取金山鎮江之賊勢成孤立不難  
水陸夾攻以圖克復而金陵失其犄角之勢冀有轉機著該大臣  
等統籌全局謀勇兼施毋得日久因循坐待兵疲餉乏致有意外  
之虞將此由六百里諭令知之○袁甲三奏進剿鄧家圩等處賊  
匪疊次獲勝見已移營督兵偪圩環攻賊勢漸形窮蹙得旨覽奏  
移營獲勝各情尙屬得手雖云各圩往來之路已斷惟賊信能通  
可見不過圍其一半著卽迅速進攻勿令竄逸○以周士鎧爲河  
南按察使由河北道遷○丁酉諭內閣英桂勝保奏連獲大勝攻破柳  
溝賊巢一摺捻匪竄踞三河尖以柳溝集爲門戶勝保督派兵勇  
分路進攻將巢內賊匪悉數殲斃平毀柳溝集賊巢尙爲得手著  
英桂等督飭將士迅將三河尖老巢剋日殲除並卽撥兵援應頴

上其竄撲固始逆匪業經官兵擊退仍著英桂等調兵防堵毋稍疏懈○駱秉章奏楚軍克復袁州分宜各城後江西西路諸賊仍堅踞瑞州臨江吉安三府城池臣飭卽補道劉長佑率所部五千人由分宜進剿新喻以攻臨江之西南知府蕭啟江率所部三千五百人由萬載進復上高以攻臨江之西北維時吉安諸軍兵力尙單復調參將田興恕新舊虎威軍一千二百餘名與劉長佑分道前進劉長佑率所部進駐分宜於上年十二月初九日卽攻克寶山賊壘乘勝尾追立復新喻縣城餘賊擊退節節掃蕩而前見在劉長佑一軍已進駐羅坊其蕭啟江一軍於上年十二月十三及本年正月二十七二月初三等日在上高縣等處屢獲大勝先後斃賊數千臣以該軍尙單飭直隸州知州劉騰鴻等馳往助之又密飭道員王鑫不必專駐一隅惟確探悍賊大股所在星馳雕

勦庶臨吉瑞一帶有此一支勁旅策應三城有一先下兵力足敷  
調遣自可剋期埽蕩 上諭湖南官軍克復袁州分宜郡縣後江  
西西路諸賊仍踞臨江等處經該撫飭令卽補道劉長佑由分宜  
進勦平寶山賊壘立將新喻縣城克復蕭啟江劉騰鴻自瑞州分  
援各軍復斬擒數千名見在劉長佑仍進駐羅坊該撫飭調記名  
道王鑫馳往援勦無難剋期埽蕩迅復堅城前此劉長佑營盤被  
陷本有應得之咎念該員屢著勞績且身受重傷仍能轉敗爲勝  
著從寬免其置議所有陣亡各員弁等並著該撫查明具奏○諭  
軍機大臣等英桂勝保奏請飭黃良楷挑選曹鳳練勇來營等語  
英桂等攻克柳溝集賊巢惟潁上粵逆方張三河捻巢未破旣須  
力扼西北又應兼顧東南兵力不敷分勦自係實情但鄉勇一項  
在本地防堵得力者或未能徵調遠行恐未必有二千名之多此

次英桂等所調曹屬各勇著崇恩卽飭候補道黃良楷認真挑選擇其曾經打仗素知紀律者或數百名或一千名備齊軍裝器械卽派黃良楷並添派幹弁數員管帶前赴英桂勝保軍營聽候調遣每月應需口糧卽由山東藩司籌款撥解以資接濟將此由五百里諭令知之○諭本日據駱秉章奏廣西賊首馬廷科與叛弁黃金亮結爲死黨回竄興安靈川復添入賊首傅中榮等三股二月間傅中榮等攻陷柳州府城賊首孔亞幅等均各糾黨勾結逼近省城桂林情形危急旬日未接文報等語廣西潯州未復柳州又陷茲聞賊勢猖獗已近省城勞崇光何以並未奏報見在湖南兵力過單駱秉章僅能分撥嚴守要隘前經葉名琛派廣東提督崑壽前赴粵西剿潯州匪徒此時駐兵何處此外本省兵勇尙堪徵調者共有若干名或飛咨廣東撥兵援應著勞崇光卽將見辦

情形迅速馳奏以慰廑念將此由六百里諭令知之○雲貴總督  
恆春等奏已革副將陳得功前經御史李培祐劾其習教各款查  
明均非實情見在師宗縣帶勇顯著戰績請免發遣責令勦辦回  
匪得旨師宗一帶見未全行肅清正須該革員一手辦理況詳查  
各情並非實在著仍遵第三次諭旨俟續著勞績卽行奏請免遣  
俾知奮勉以贖前愆○駱秉章奏查安福既克臣卽札飭駐防茶  
陵州鄱縣攸縣官軍各自防所進攻江西永新永甯蓮花廳等廳  
縣並委知縣劉拔元等由桂東進攻江西崇義上猶龍泉等縣上  
年十二月間趙煥聯率所部兵勇千五百人進勦永甯縣城共斃  
賊二百餘名遂復縣城復有三堡之捷斃賊五百餘名十九日有  
花木凹之捷斃賊數千是日鄱縣官軍亦有橋嶺之捷斃賊亦近  
千名千總胡國安會同江西地方官兵至永新蓮花廳則賊已聞

風潛竄遂並入城三廳縣一律肅清劉拔元復約同桂陽縣官紳帶勇進剿崇義於上堡地方遇賊擒斬五百餘名適江西南安府官兵亦到同復縣城紳士李召棠等又擊賊於淋洋殺賊數百名而上猶賊已潛遁十一月十五日胡兼善等進剿龍泉之陽湖賊巢斃賊七百餘名十七日分路擊賊於山坳士卒入險各懷鬪志斃賊甚多遂移營搜剿黃坑樟木坑之賊正月十六至二月初十等日各路亦疊有斬擒該賊悉數退踞龍泉縣城萬安之賊及崇義上猶永新永甯各賊亦均退聚於此比官軍逼城而營賊眾五千餘分兩路出城來撲劉拔元等豫伏營前賊至伏起共斃賊八九百名臣當嚴飭各軍相機進剿以期將失陷城池悉行收復報聞○戊戌諭內閣近年江浙二省辦理海運湖廣等省辦理折色所有停運軍船前經戶部奏請將年分較遠者迅卽變價並節次

奏請飭催漕運總督查辦茲復據該部奏稱迄今年餘尙未據該  
漕督奏明辦理著邵燦卽將見辦情形迅速具奏並著有漕省分  
各督撫迅將各該省停運軍船分別已未歸次並年分較遠可以  
拆變船隻數目及節年應徵造船銀兩餘贖若干統限兩箇月詳  
細查明具奏妥速辦理以歸覈實而節虛糜○諭軍機大臣等前  
據崇恩奏派委總兵王鵬年登州府知府汪承鏞等籌護新漕並  
據怡良等奏稱雇募勇船會同水師巡緝當經諭知怡良遵照成  
案令護漕師船至東省石島洋面交替明白再行南下俾南北水  
師各專責成本日據端華等奏江浙運糧莊合順等沙船四隻在  
山東蘇山養馬島各洋面被盜劫去漕米多寡不等並劫去經費  
銀二千三百餘兩等語漕糧爲天庾正供數日之間四船先後被  
劫該水師將弁所司何事實非尋常疏忽可比著趙德轍崇恩速



卽查明所有蘇山等洋面如在石島迤北著崇恩將東省所派鎮將等從嚴參辦若在石島迤南則江省將弁無可辭咎卽著趙德轍嚴參懲辦續來漕船尙有百餘隻之多應如何嚴密巡護並著趙德轍崇恩嚴督各該水師將弁實力經理毋許再有疏失被劫沙船內除王鱸鄉一船係在養馬島失事其餘三船均在蘇山被劫恐該處海島內必有匪巢屯踞並著崇恩督飭將弁密速搜捕以清盜藪此次劫案務須人賊並獲毋令漏網儻或竄入津沽等處著譚廷襄飭令各該海口員弁先事嚴防不准稍涉疏懈致令闖入將此由五百里各諭令知之○諭本日據福興文俊奏吉安官軍再克峽江水師焚毀賊船淨盡一摺見在該省西路軍情瑞州已嚴密兜圍臨江之賊亦紛紛敗散惟由新淦渡河東行者約一二萬人恐其併入撫州一路或分竄建昌廣信是東路情形倍

形喫重福興見在趕緊出省籌辦東路防剿事宜是否先往廣信抑係先往撫建著卽相機酌辦先其所急何路最要卽先由何路進兵文俊在任兩年毫無布置致令江西賊匪擾及閩省光澤邵武相繼失守若不力加整頓必致不可收拾見已授耆齡爲江西巡撫著卽會同福興籌畫機宜務使各路軍情日有起色方爲不負委任福興出省後卽著耆齡悉心籌辦妥爲調度毋得稍涉因循致有貽誤將此由六百里諭令知之○庚子予陣亡遊擊馬鎮國祭葬世職○辛丑奉安 孝靜康慈皇后梓宮於 慕東陵○諭軍機大臣等有人奏署兩淮鹽運使淮揚道郭沛霖署任四年之久所徵淮南稅課日形短絀通泰所屬二十場每年抽稅可得制錢一百萬串咸豐五年分該司造報淮南奏銷僅收錢十萬餘串近來添卡愈多徵稅愈少並信任泰州運判洪國柱冒領運庫

銀五萬兩未經報銷洪國柱侵蝕泰州稅錢八千餘串延不批解該署司代爲彌縫完結各等語鹽課爲帑項大宗淮南所屬引地尙多完善之區當此餉需支絀宜如何竭力籌維若如所奏徇縱屬員虧短稅項尙復成何事體著何桂清趙德轍按照摺內所指各節將該署運司任內所徵稅課徹底查明據實參奏洪國柱如查有侵那庫銀稅錢等弊著卽先行撤任一併嚴究懲辦以肅錢政本日降旨令常鎮道喬松年署兩淮鹽運使已革藩司聯英見已發往河南差委著該署督等於聯英到江南後卽飭令協理兩淮鹽務並令喬松年等認真經理力清弊竇俾鹽務日有起色以裕餉需是爲至要原摺著鈔給閱看將此諭令知之○浙江巡撫晏端書奏籌議接辦浙鹽運赴江楚銷售卽以課項接濟餉需俟淮鹽運道疏通再行奏明停止並請令補用三品京堂張芾就近

督運允之○命已革江蘇布政使聯英發往江南交署兩江總督何桂清差委○壬寅諭軍機大臣等福濟等奏皖餉不繼大局難支一摺據稱各營兵勇裁汰老弱尙不下二三萬眾加以李孟羣帶來楚兵每月需銀十七八萬兩方可敷衍近日山陝江省解來餉項數萬兩僅敷十餘日口糧請於江海關每月撥解句容大營二十萬兩內每月分撥皖銀二萬兩並片奏聞淮安府庫存有捐湊制錢三萬串楊村剝價銀三千兩係豫備金陵善後之需請暫將此款那用等語皖省缺餉情形實較他省爲緊急前此無巢之陷桐城之潰皆由餉糈不給山陝等省協濟之項旣不能如數撥解何可坐視飢疲致令軍心渙散著何桂清趙德轍卽於江海關月解句容餉項內分撥二萬兩解赴福濟軍營藉資支給其淮安府庫是否存有捐項及剝價銀兩並著該署督等查明如可暫那

亦著一併解往以應要需將此由六百里諭令知之○諭安徽軍  
餉缺乏自係實情惟本年山陝河南浙江蘇陸續撥解皖餉數  
已不少並據庚長英桂奏籌米麥八千石解赴該省前曾諭令福  
濟設法迎提見在本省既無可籌撥自應先就各省已撥之款趕  
緊催提並疏通糧道俾得源源接濟斷不可專待部撥之款致有  
貽誤將此由六百里諭令知之○以廣西新甯州城被匪竄陷革  
代理知州徐師銘把總梁琨外委黃大邦職仍畱營效力○予江  
南陣亡從九品彭玉超等廣西陣亡遊擊韓鳳祭葬世職○甲辰  
諭軍機大臣等邵燦等奏派撥兵勇會剿邳郊等處捻匪一摺前  
因郊城界內有新起捻匪肆擾諭令崇恩酌派官兵會同徐州帶  
兵各員悉力殲除茲據該漕督等奏該匪被剿敗退分撲宿遷之  
峒嵒驛復經我軍回擊見在峒嵒紅花埠驛路肅清惟邳邳海沐

各處素多土匪該匪沿途襲脅已有二千餘人勢甚猖獗屢經邵  
燦庚長分派弁兵前往海沐一帶鈔擊崇恩諒亦派員帶兵會剿  
此股新捻雖經東竄不可區分畛域致令匪勢鴟張著崇綸仍飭  
地方文武並派出官兵越境會剿杜其回竄俾得及早撲滅並著  
邵燦等飭令侍衛伊興額遊擊安田同知朱善張等各帶兵勇馳  
往海沐一帶相機兜剿毋令蔓延將此由五百里各諭令知之○  
以 孝靜康慈皇后梓宮奉安禮成予恭理事務王大臣加級有  
差賞恭請 昇擢校尉民夫銀○丙午予守護 西陵及承辦  
慕東陵事務大臣官員加級有差賞領催馬甲兵丁一月錢糧○  
戊申署兩江總督何桂清奏送親北上宿遷道中接奉寄諭卽折  
回江南所有籌防籌餉事宜容蒞任後與撫臣盡心經理得旨卿  
膺茲鉅任一切展布朕將拭目以待惟汝父進京有何人在側可

奏來朕甚念焉○以紳民力保危城永廣湖北襄陽縣文武學額  
各二名○已酉諭內閣御史李培祐奏請將失守城池人員應得  
罪名飭令迅速查辦一摺粵匪滋事以來各省失守城池之文武  
員弁業經查辦者已屬不少茲據該御史奏稱河南湖北江西安  
徽等省尙有未經查辦各員不足以昭炯戒著吏兵二部查明具  
奏毋令日久延宕致有疏縱○諭軍機大臣等前因福濟駐兵梁  
縣廬州餉道無虞梗阻特諭秦定三卽帶貴州官兵及眞勝勇一  
千二百名馳赴和春軍營助剿本日據福濟奏正陽關業經攻克  
臨淮一帶更無須該提督帶兵駐守見在江南軍營攻剿喫緊著  
秦定三卽帶所部兵勇刻日前往丹陽毋許再事逗留其各省撥  
解皖餉經由道路卽著福濟設法疏通以資接濟將此由六百里  
各諭令知之○以富廉張錫庚爲左副都御史

富廉由大理寺卿  
張錫庚由太僕寺

遷卿

○恭修

宣宗成皇帝本紀告成子提

等官升敘有差○福

濟鄭魁士奏查正陽扼水陸之衝爲皖豫緊要門戶自捻逆盤踞

南北各軍聲息不通

臣

等飛飭署廬鳳道金光飭於壽州解圍後

相繼進取於四月初開派把總黃鳴鐸管帶幹勇五百餘名由水

陸進襲搶獲大小賊船五十八隻斃賊三四百名復督壽州知州

黃元吉會齊團練進攻隱賢集將賊館一律平毀賊匪均歸正陽

老巢不下十數萬該署道於初十日督同遊擊成桂等統帶兵勇

齊向正陽進攻行至雙橋集卽見逆眾蟻擁而來當經成桂擊退

該署道督勇追殺約斃一千餘名十三日探得正陽水陸人數雖

眾被我軍連日偏攻勢漸窮蹙該署道卽飭把總黃鳴鐸由水路

晝夜轟擊一面親督成桂等進撲正陽直抵五里鋪將陸路賊營

全行躐毀斃賊二千餘名黃鳴鐸亦會同縣丞劉錫齡等由水路



力攻該逆仍歸鎮內死力堅守十六日該署道乘賊不備督飭各營衝入鎮內前後擒殺斃賊二百餘名黃元吉率同各團截殺又斃賊一千餘名當即克復正陽關所有此次尤爲出力各員謹先行開列奏請獎勵奏入賞金光飭成桂巴圖魯名號○予安徽陣亡知縣張雲祥祭葬世職○庚戌諭內閣王懿德奏請將因病取巧之臬司懲處等語福建按察使保泰在延平防剿因病告假業經該督查明尙非藉詞規避惟不候代理人員接印交卸輒將印信委員齎送回省就醫究屬迹涉取巧保泰著交部議處○諭軍機大臣等王懿德奏逆匪連陷縣城並建甯府城被圍請飭調兵助剿各等語江右逆匪闖入閩疆自攻陷光澤邵武後建甯府屬之崇安建陽邵武府屬之泰甯建甯四縣城池相繼失守逆氛猖獗復敢圍攻建甯府城賊眾兵單該督請催饒廷選仍統原帶福

建兵勇一千名折回浦城並令鍾寶三統帶溫台精兵五百名由溫州福甯一帶趨赴延平披覽所奏情形實屬萬分緊急王懿德由省赴延督勦所帶兵數僅有福甯兵五百名省標兵二百名當此寇氛四逼非厚資精銳難資堵遏昨據晏端書奏已調溫台兵七百餘名由鍾寶三帶從福甯取道邵武金處兵三百餘名飭吉祥帶往福甯著晏端書飭令迅速趨入閩境毋稍稽延饒廷選一軍因三衢防務喫重未能折回閩省惟該撫昨奏派往三衢防堵有甯國彪勇八百餘名派往仙霞嶺駐紮亦有操練兵五百餘名楚勇六百餘名原以固浙省藩籬惟與其在仙霞等處株守待賊不如越境追勦與閩兵合力速解建郡之圍著晏端書卽飭堵勦仙霞將弁拔隊前進再由三衢防堵兵勇內酌撥千名一併前赴建甯歸王懿德調度以期迅掃賊氛所有浙省派往兵勇並著晏

端書按濟軍餉俾免缺乏一面飛咨鍾寶三兼程援救邵武毋再遲延王懿德業已出省前赴延平著卽親督各兵相機調度以期殲滅羣醜毋令再有蔓延將此由六百里各諭令知之○是月展賑山東濮州等十四州縣被災貧民一月口糧展緩福建將樂等十一縣及麻沙等縣丞所屬被災被擾地方新舊額賦蠲免順昌等六縣及仁壽等縣丞所屬被擾地方上年額賦貸湖南鳳凰等五廳縣丁佃籽種口糧

五月壬子胡林翼奏查鄂省克復後該匪日思上犯武漢三月二十六日安徽布政使李孟羣率二千五百人援皖啟行後臣接據署蘄州知州彭應鯉稟報探得悍賊七八千人於四月初四日竄踞安徽英山縣城又由六安霍山壽州等處分股上竄當卽飛調各團分扼要隘親督練勇赴英山羅田交界之樂利河駐紮署蘄

水縣劉第督勇駐該縣之雞鳴河查爾山朱洋河一帶適李孟羣援皖之師亦至卽飭都司盧又熊集於羅田境上初五日彭應鯉擊賊梁家灘勝之初六日英山之賊分股出撲我營彭應鯉又勝之斬三百餘名生擒六十七名盧又熊截賊於途斬大旗手七名追至柘梓堰生擒四十名而返賊卽退回英山初七日賊添集六安霍山之眾又至盧又熊戰於樂利河身受多傷勇丁稍卻李孟羣揮軍援之仍將賊擊退次日賊分五路撲雞鳴河一帶把總徐兆達會同紳勇擊退初九日羅田團勇擊擄糧之賊獲米百餘石而是日酉刻蘄水團勇失利於雞鳴河李孟羣飭盧又熊率師往援仍有斬擒賊乃於一晝夜內合數路之眾併力齊撲意在乘虛而上彭應鯉探聞準備李孟羣卽飭參將趙鴻舉等分投迎剿密令羅田縣在籍同知廖新率團勇鈔賊之後十一日賊隊大至我

軍一由兩河口攻其南一由四口塘攻其北一由西路攻樂利河彭應鯉由大坂河戴家坂等處進駐扼賊下竄自辰至申鏖戰四時之久斃賊二千餘名生擒三百餘名反走之賊則爲廖新之勇迎頭截擊彭應鯉率勇乘勝克復英山縣城其竄至雞鳴河之賊經盧又熊會靳羅各勇截於河干使不能越遂向太湖一帶東竄見在各軍回剿靳州之賊查北岸之黃梅廣濟羅田靳水皆與皖省接界據李孟羣稟稱自羅田橫至靳水靳州之界有賊營十餘處而靳州靳水另有股匪萬餘分道竄入下游官軍均在賊後請卽派兵接剿遏其上竄臣查皖省宿太等處無處非賊豫省三河尖等處賊蹤尙熾江甯將軍都興阿咨稱大股賊眾竄逼必須添益兵力臣卽飛調興國防兵二千五百人於四月十二日由靳州渡江進紮張家坊又調前赴襄陽之寶義兩營回省而先派參將

葉永泰率虎營六百人自省馳赴北岸會同堵剿不敢稍分畛域  
且使援皖之師無虞後路梗塞仍飛飭李孟羣迅卽取道六安馳  
赴廬州至彭應鯉率領羅田團勇越境討賊疊著戰功此次克復  
英山尤堪嘉尙李孟羣以援皖之師途次接仗亦協機宜所有尤  
爲出力之知州彭應鯉可否以知府用其餘出力官紳員弁應請  
查明彙獎 上諭內閣賊匪竄踞安徽英山縣經援兵疊勝收復  
城池剿辦尙爲得手著卽乘勝進攻俾北岸一帶迅就肅清所有  
尤爲出力之湖北署蘄州知州彭應鯉著以知府用其餘在事出  
力員弁並著官文胡林翼查明保奏○甲寅諭內閣昨兵部帶領  
引見揀發湖北遊擊委用之武英文陞二員年力均壯開弓亦尙  
合式何以發箭均屬無準難保非有意規避昨已降旨發往湖北  
交官文差遣委用卽著該督隨時察看儻該員等不知奮勉並有

意存取巧之處卽行據實嚴參○命崇恩來京陛見以吳廷棟署

山東巡撫

由布政使署

○乙卯德興阿等奏報攻剿瓜州獲勝情形得

旨仍著實力進攻不可專俟江南捷信○河南巡撫英桂等奏袁

甲三督兵毫境擬俟亳州賊圩攻破後再令袁甲三酌帶兵勇來

潁協剿其亳州接捕餘匪各事宜卽令史榮椿督辦報可○丁巳

諭御前大臣軍機大臣等今日引見後著御前大臣軍機大臣會

同譚廷襄妥議流通大錢暨鐵制錢辦法並將將來設有窒礙之

處作何補救之方一併議及庶免京外情形有所隔膜惟不必另

立章程徒涉紛更總期潛移默運益民生而裕經費尋御前大臣

載垣等奏疏通大錢並搭收錢糧應先由直隸酌定章程再由戶

部覈計方能中外相符不至隔膜應請自本年下忙爲始直隸徵

收錢糧悉照銀七票三辦理其大錢三成卽納在鈔票三成之內

交票交錢悉聽其便仍於各府設立鈔局准以鈔票與大錢互相  
易換再以大錢分發各行店按二八搭配行使庶鈔票與大錢互  
相通融以爲補救再查鐵錢局及五字各官號捐銅局平糶處共  
存鐵當十錢五百餘萬串已足敷搭用所有鐵錢局尙鑄二成大  
錢應照見議停鑄其停鑄銅制錢加鑄銅大錢應由戶工兩部酌  
改卯額分別奏辦總以鐵制錢與銅大錢相輔而行仍以寶鈔運  
實於虛以便民利用從之○江西巡撫文俊奏瑞州一軍屢獲勝  
仗賊勢日漸窮蹙臨江之賊自陰岡嶺敗後大半回竄撫州其勢  
已弱見經劉長佑等督率江楚兵勇水陸合攻聲勢甚盛得旨瑞  
臨兩處微有轉機著趕緊飭令攻剿迅期掃蕩勿任餘賊負隅又  
擾竄他處徒受牽掣日後止能收復空城未殺多賊以一奏報塞  
責也○以湖北官軍援剿江西克復奉新靖安崇義等縣城賞總



兵官壽山阿隆阿守備吳修啟普承忠花翎餘升賞有差○己未  
官文都興阿胡林翼奏臣官文胡林翼接據安徽布政使李孟羣  
稟報賊首陳玉城由桐城率三萬餘眾又裹脅皖省饑民數萬併  
力上犯已分道竄入黃梅廣濟蘄州蘄水羅田五州縣境希圖梗  
截大營後路並以阻遏援皖之師路歧賊眾防不勝防亟應厚集  
兵力以資堵剿等語臣等再四籌商實無可增之兵止能移緩救  
急當抽調李續賓所部一千五百人渡江駐小池口而以原駐小  
池口鮑超五營分移孔隴黃梅其蘄州羅田一帶則調興國防兵  
福武寶三營渡江應援恭鳳二營繼之又由省調虎營六百人助  
剿李孟羣援皖之師則由羅田直抵英山遏其上竄四月十八日  
知縣李景湖率福營都司金殿安率前左寶營守備余雲龍率武  
營由青石嶺大路前進署蘄州知州彭應鯉都司盧又熊等率羅

田勇由王家壩小路前進同攻張家壩賊與青石嶺官軍相持羅田勇鈔後來擊盧又熊督勇接應大勝之斃賊千餘名內有僞指揮一名十九日賊眾大股來犯福武寶各營三路分進賊又分七路來衝李景湖率勇直前斬悍賊數十名賊勢稍卻而七路之賊漫山徧野寶武二營爲賊隔截李景湖率千總張鵬高等衝突鏖戰眾寡不敵同時陣亡參將張寅恭揮兵迎擊福武寶三營又回兵合攻斃賊百名賊始敗退二十日參將葉永泰率虎營至都司徐統恩率鳳營亦至賊於河北分六股河南分八股約萬餘眾各營堅壁以待賊數次誘戰相持不動日午賊懈始尾追之頗有斬獲次日賊又分股萬餘竄撲夫子嶺斬州青石嶺各營因營官戰歿軍中缺食勇丁稍潰其不潰者退保斬州臣胡林翼飛調候補知府邢高魁由興國渡江一面籌運米石飭令重加整頓力扼斬

州又加派都司段清平等率平超二營一千二百人由省疾趨黃州會同署黃州府知府許廣藻署黃州縣知縣黎道鈞扼蕪水上竄之路臣官文先期調副都統舒保所部馬隊百人由襄陽回援副都統銜巴揚阿遣散川勇甫抵宜昌亦檄令迅速回援此賊犯蕪羅互有勝敗並抽調救援之情形也臣都興阿駐下游陸家背偵知賊竄黃梅縣屬之亭前驛渡河橋一帶隨派多隆阿率馬隊往剿四月二十日賊分三路各萬餘來撲縣城多隆阿同王國才及各營總分路擊之馬隊踰溝越嶺追賊過河毀賊壘二座忽賊由山坳鈔我步軍之後我軍回騎渡河策應斃賊四百餘名探知各處賊壘共六十餘座我軍馬步分防相距百餘里策應不便派鮑超以霆字二營移孔隴驛李續賓以九江三營移陸家壩而小池口之賊乘閒突出經營總巴克坦布等督隊馳剿都興阿由孔

隴督隊接應擒斬頗多先是賊伏二三千於蘆葦中而以悍賊數百誘戰官軍在江岸遙見蘆葦隱動遂以槍箭環施馬隊亦由江岸鈔擊立斃伏賊七百餘名生擒九十名餘皆帶傷而逃是夜我軍分百人潛過渡河橋攜帶火器伏於麥田深處二十四日都興阿率馬步隊攻渡河橋多隆阿等各帶馬步隊分路齊進賊麕聚數萬隔河對放槍礮我軍鼓勇渡河立破賊營數座賊卽反奔我伏兵遂向各營壘拋擲火彈賊益驚潰焚毀賊壘二十七座斃賊二千數百名此下游馬步各軍移剿獲勝之情形也臣等查武漢克復後該逆無日不思上竄且自江甯桐城安慶至九江千里而遙沿江並無官軍阻截饑民游勇溷入城中非合全軍之力不能截遏賊鋒查九江及興國各營均已抽撥移紮而寶義平超四營又分赴黃州蘄水省城守兵不滿千名添兵則餉無可籌餉竭則

兵心益渙見在楊載福水師聯布江面尙爲安靜馬隊千餘疊次力戰頗覺疲勞已飛催舒保巴揚阿訥依璋阿各率馬隊馳赴策應除飭各路水陸馬步乘勝力攻外所有陣亡知縣李景湖等可否仰懇 天恩從優議卹以慰忠魂 上諭內閣皖省賊匪分竄湖北蘄水邊界經官文等調援策應疊獲勝仗大挫賊鋒著卽激勵將弁乘勝進攻將續至援賊盡數殲除毋令上竄所有陣亡之知縣李景湖著照知府例從優議卹千總張鵬高楊高桂均著照都司例從優議卹把總胡開禮六品翎頂朱大倫均著照千總例從優議卹○諭軍機大臣等前據英桂等因兵力不敷奏請飭調湖北官兵當經諭令官文等酌調千兵赴豫會剿茲據該大臣等奏賊眾兵單楚軍亦難調撥請飭陝西省卽調龍澤厚一軍馳赴英桂軍營等語龍澤厚所帶陝兵前經英桂等奏因光固一帶喫

緊已飛咨該副將前往援剿見在龍澤厚是否已赴光固尙未據英桂等續報著曾望顏迅卽飭令該副將前往河南聽候英桂等調遣至三河尖逆匪敗竄復踞方家集負隅抗拒英桂等亟應督兵前進痛加剿洗所有直隸省調赴潁州官兵一千名此時諒已到營所調山東省黃良楷管帶曹屬練勇當亦到營兵力不爲單薄著卽將方家集一帶逆匪趕緊會剿次第肅清毋再延宕將此由六百里各諭令知之○庚申諭軍機大臣等和春奏連日攻剿句容逆匪獲勝情形一摺此次官兵連日進攻句容和春張國樑均能親督兵勇擒斬尙多惟該逆負隅日久牽掣我兵傳振邦攻勦溧水雖經獲勝我軍亦有傷亡終尙未能得手且聞該逆有內竄高淳之意雖經和春等撥兵堵剿但句容溧水二城不克日久必生他變當此餉缺兵疲豈可日事遷延不思迅圖克復著和春

張國樑督飭傅振邦等分路圍攻迅將三城克復再圖併力攻打鎮江毋得坐耗錢糧自取罪戾再據福濟奏秦定三軍營管帶黔兵之遊擊聶桂榮都司黃國亮居心險詐遇事把持勾串不法兵勇赴盱眙五河等縣勒派捐輸民情怨恨秦定三已由正陽關馳赴江南著和春嚴密訪查如聶桂榮黃國亮實有把持生事情弊卽行據實嚴參毋稍徇隱將此由六百里諭令知之○貴州巡撫蔣蔚遠奏請畱新授提督佟攀梅總兵官蔣玉龍巴揚阿協同督辦軍務暫緩陞見允之○予江南陣亡參將滿祿等祭葬世職○辛酉命前任甘肅布政使常績以三品京堂候補○壬戌諭軍機大臣等有人奏江南大營有保升總兵之副將王浚前在廣東署副將任內失機參革後投效廣西黃緣開復去年五月向榮派赴仙鶴門攻勦因該副將平日剋扣兵餉是以兵不用命連戰失利

敗至馬羣地方致失營不能紮住退守丹陽其時兵勇聲言如將  
該副將正法卽當奮勇爭先同心殺賊該副將知犯眾怒請假經  
旬和春到後復令該副將充當翼長將士均聽指揮恐貽誤軍情  
各等語該副將恇怯無能屢經獲咎又復營私扣餉致失兵心值  
此防勦喫緊之時未可畀以重權和春初到江南未必知王浚儼  
事前情今既有人指參著該大臣秉公查辦據實嚴參毋得稍存  
回護致誤大局再朕聞江南大營壯勇人數過多往往不能打仗  
徒費錢糧甚至於丹陽一帶潛行劫掠以營盤爲藏身之地地方  
官無從拏辦當此軍餉支絀急應裁汰浮濫又況此輩行同賊盜  
豈可令其匿迹軍營著和春卽將無用之勇設法裁撤並查明滋  
事各勇拏交地方官嚴行審辦以肅軍律又聞營中委員實在辦  
事者本屬無多此外皆徇情濫收一爲希冀保舉一爲圖得薪水



口分其中奸猾之員竟以軍營爲利藪軍士每憂缺餉而若輩轉坐享膏腴尤爲可惡並著和春查明將各營濫設委員嚴行裁汰以期餉歸實用不至虛糜將此由四百里諭令知之○袁甲三奏擒匪分踞王姚鄧三圩勢成犄角王圩距鄧圩中隔一溝不及二里圍攻尙易得手姚圩在鄧圩南七人里我兵勢難分布且東南一帶徧地伏莽我軍由東西北三路進攻必須先破王圩方可次第直下該匪屢創之後堅壘深溝伏匿不出臣督飭史榮椿朱連泰等設法誘戰王圩一味堅守姚鄧兩圩之匪於四月十一至十四等日疊出馬步千餘人紛撲營盤我軍踰溝迎剿殺斃甚多生擒十六名卽於西北搶築礮臺連次轟塌圩內房屋多處十六日進攻王圩該匪於牆內用槍礮抵禦我軍搶過重濠拋擲火器斃賊甚多圩內人聲鼎沸南面乘閒逃出數十人瞥見我軍馬隊復

又回圩死守二十一日鄧圩賊匪數百潛出割麥被我軍剿殺殆盡二十六日突出悍賊二千餘過溝直撲我營兵勇左右鈔擊賊匪敗退其不及回圩者竄匿深林生擒四十餘名餘俱縱火焚斃無一漏網二十七日復於王圩西南東南偪紮二營緊扼賊吭二十九日各圩賊旗同時偃息有鄉民數十人奔赴大營以三圩賊匪均願薙髮繳械跪求乞命當飭委員細心盤詰明白開導諭以被脅良民如果真心悔罪必須立將逆首擒獻槍礮繳官賊圩一律毀平方能代懇 天恩網開一面否則萬難允准遣令回圩趕緊商明稟覆候至次日並無信息 臣思此輩梟獍若不制其死命必貽後患初一日先分馬步隊由東南前進作爲欲攻鄧圩之勢該匪於內濠之外分布千餘人經我軍擊斃百餘立時回圩西北攻王圩之兵甫經出營該匪於圩邊分布一二千人接仗另有馬

賊二百餘騎從南路來勢更猛悍我軍馬步分擊斃賊三四百人  
臣以該匪壘受大創勢已窮蹙惟瞬息麥收南賊時有竄回之信  
必須趕緊掃除免致勾結初三日親赴礮臺督催諸軍分四路進  
攻王圩並派馬步隊排列東南一帶以防兩圩賊援我軍同時齊  
進立將賊濠三道填平該匪等伏匿圩內礮子如雨我軍衝鋒直  
抵牆根搭架雲梯守備龔耀綸奮勇揮戈直上匪等死拒出身牆  
外用短兵格鬪顴石飛擲我兵受傷甚多而勇氣百倍奪獲大礮  
三尊賊勢不支呼吸可破而天忽大雨火藥全溼梯滑不能立足  
不得已緩緩撤回其鄧圩來援之賊亦被馬隊壓退擊斃數十人  
初五日復在王圩正西六十步外冒雨搶紮一營高築二丈礮  
臺俯瞰王圩從上擊下尤爲得勢臣惟當督同該鎮等乘此賊勢  
窮蹙趕緊合圍以期立平賊壘不敢稍有遷延再前准勝保函稱

南路大兵擬攻潁上屬臣營分兵南下豫備夾擊當卽撥勇六百

名派員管帶函覆勝保酌定駐紮地方會合攻剿旋據函稱潁上

圍解無須北路分兵前往等語惟查南路賊蹤分竄見均在沙河

以南其沙河以北處處賊巢勾結響應防不勝防初一日攻圩交

仗間卽有南來馬賊幸被擊退訊據獲犯供稱係南竄捻首劉老

淵率黨回救圩匪難保不去而復來且見在三圩之外由毫至潁

不下數十圩均以禦匪爲詞其中可畏可莠首鼠兩端者正復不

少臣已派員分路巡查令各圩造具戶口清冊相機辦理此潁河

以南情形也至渦河以北自前月之望南賊竄回省絡繹不絕若

查拏太嚴恐偪回南路激成死黨無以解散脅從若任其往來日

久嘯聚又成北路之患當經臣飭委道員支方廉督同文武委員

帶兵往巡其被脅逃回業經薙髮者准其族鄰出具保結收入團

練以期化莠爲良其不肯薙髮者自係仍思接應捻匪萬難寬宥  
經支方廉等先後擒斬四百餘名內如著名捻首蘇添喜黃秋陳  
豹孫長青龔信等同時併剪匪眾膽寒以見在而論似尙不至別  
有句結惟臣見因攻圩喫緊移紮南路渦北數百里毗連豫疆宋  
郡練勇及分防永城之山西官兵均經撫臣英桂裁撤自爲節省  
軍餉起見而北路過於空虛宋郡藩籬毫無可恃臣再四籌思苦  
無長策應如何妥籌防範恭候訓示遵行再臣見駐之地距亳城  
已逾百里攻破三圩後尙須掃蕩而南北路萬難放心前於三月  
內奉旨飭派來亳駐紮之武職大員經臣疊次函致英桂至今尙  
未定議已由臣再行函催 上諭該匪分距三圩互相犄角其並  
無悔禍之意已可概見袁甲三察其乞降之詐併力進攻復偏圩  
築營憑高下擊辦理尙合機宜惟該匪既與南賊勾通則聲息尙

難遽斷必須迅速攻克埽除一處賊圩卽少一路枝節雖據奏稱王圩之賊萬分窮蹙鄧圩之賊亦被遏截而轉瞬麥收將熟儻南賊實圖回竄則死灰難免復然史榮椿朱連泰等均係得力鎮將正當乘此聲威一氣埽蕩卽與英桂等會兵進剿不可久爲圩賊牽掣致分兵力至所請駐毫帶兵大員英桂等前奏原以有史榮椿在彼毋庸另派惟袁甲三攻破賊圩南下之後若令史榮椿坐守亳州則帶兵進剿少一得力大員恐於事轉無裨益歸德練勇及永城防兵均已裁撤渦河以北不免空虛著英桂勝保酌量另派大員能督辦後路防守事宜者前赴亳州一俟袁甲三史榮椿攻克三圩統兵前進卽著派出之員駐守亳州隨地搜捕以固豫省藩籬將此由六百里各諭令知之○癸亥諭內閣樂斌奏剿捕番匪獲勝一摺上年甘肅嘉峪關外驛路時有山內果洛克賊番

出伺行劫經提督索文派兵入山搜捕將潛匿祝魯果賊番痛加  
剿除本年四月閒探有賊番在素賴地方插帳復派兵勇前往攻  
擊賊番搶占雪山抗拒槍礮對轟晝夜環擊兵勇復由閒道繞至  
賊後兩面夾攻轟斃一百餘名斬獲首級八十三顆生擒番僧一  
名番賊一名跌落崖澗雪害者不計其數奪獲牛馬驢羊六千餘  
隻立將巢穴燒毀淨盡積年兇匪全股殲擒辦理尙屬認真所有  
在事出力官弁兵勇著該督查明擇尤保奏候朕施恩○諭軍機  
大臣等安徽藩司李孟羣由湖北帶兵赴援廬州途次克復英山  
業經官文等馳奏本日據該藩司奏稱逆匪自剿敗後復糾大股  
屯聚張家塆地方圍襲黃梅大軍之後而霍六逆匪有竄至河南  
商城境內者有進窺英山者該藩司添募壯勇嚴扼羅田隨剿隨  
進每月需餉三萬餘兩皖省道路不通湖北續撥餉銀支放已盡

請飭撥專餉以資勦辦所奏自係實情英霍蘄黃等處賊勢蔓延楚皖兩軍皆有鞭長莫及之勢今得該藩司一軍盡力勦辦則上可以固湖北藩籬下可以通廬州道路關繫實爲緊要該藩司原帶兵勇二千五百名兩次添募又四千餘名每月需銀三萬兩尙不爲多著官文胡林翼先速籌銀二萬兩解赴該藩司軍營以資接濟此後如廬州道路尙未能通仍著官文等酌量籌餉協濟至皖省餉需起解在途者尙有十餘萬兩李孟羣一軍已到安徽地界福濟豈能置之度外著於各省撥餉解到後疏通道路酌量分撥解往俾得迅速勦辦直達廬州又李孟羣片奏皖楚交界各屬必須激勵團練以助官軍等語所奏甚爲剴切所有兩省交界地方官紳士民團練殺賊及捐貲練勇著有勞績者卽著該藩司查明擬定獎勵如係安徽所屬卽詳明福濟如係湖北所屬卽詳明



官文胡林翼奏請優獎以昭激勸將此由六百里諭知官文胡林翼福濟並傳諭李孟羣知之○諭慶端奏汀州府及屬縣相繼失守等語江西逆匪竄入閩省地方邵武失陷建甯被圍近已竄陷汀州府城暨甯化縣城會匪連陷清流歸化而泉州府城亦被匪徒乘機攻撲下游騷動各處蔓延情形深爲可慮前已諭令葉名琛撥兵二千名赴閩本日又令添撥一千或數百名一併星馳助剿惟汀泉二府相距寫遠泉州與福州省城較近自應先援泉州或分兵援應汀州已令葉名琛酌量辦理著王懿德察看情形飛咨廣東先其所急無誤事機閩省各路匪徒蠢起已成燎原之勢援兵未到之先應如何調兵分布王懿德已赴延平居中調度慶端駐守省垣務須嚴扼要隘以待調齊兵勇分路進剿所有浙省援兵是否已到建郡自擊退賊匪之後能否撥兵固守堵禦邵武

賊蹤至汀州等屬失守該撫僅據各路稟報並著查明詳細情形及文武各員下落一併具奏將此由六百里諭令知之○諭閩省賊勢蔓延兵單餉缺王懿德見往延平居中調度若無鄰省重兵救援恐成瓦解之勢前諭葉名琛調撥廣東兵二千名並籌濟口糧諒已遵照辦理惟彼時止爲援應邵武一府起見今汀州失陷泉州被圍恐兵力尙屬不敷著葉名琛再行酌量添調或三千名或數百名派委得力大員一併統帶星馳赴閩其經由道路泉州偏近省城自應先援泉州次邵武汀州雖與廣東接壤其距泉州尙遠能否分兵協剿之處並著葉名琛斟酌辦理毋誤事機將此由六百里諭令知之○乙丑諭軍機大臣等有人奏淮揚各屬下河水利請飭將運河各臚壩相時啟閉一摺據稱淮揚一帶近歲田畝歉收不盡由豐工未築清淮以下無水之故實因高寶五壩

耳牖未啟有司既恐啟閉經費無出劣紳土豪復藉買水爲名圖飽谿壑以重賂營謀竟敢於官河築壩攔截使下游涓滴無沾而下游八壩概不堵築致運河水無停蓄上游灌溉無資邇來漕艘既歸海運水利專在民田儻能及時啟閉藉可蓄水濟旱歲費工程不過萬金並可計畝攤捐等語河工設立牖壩原以利益便民必當因時制宜俾田畝無水旱之憂於民食軍餉均有益著何桂清庚長按照摺內所稱各情形詳細體察酌量辦理原摺著鈔給閱看將此各諭令知之○諭前因江南大營壯勇潛出滋事並委員人數過多諭令和春分別擊獲裁汰連日復有人奏江南抽捐名目過多糧臺委員百餘任意開銷蘇常兩府二三百里內設立抽釐局卡至數十處之多稽查難徧弊竇百出近復有擬爲畝捐鋪捐丁捐之說科派紛繁徒滋擾累糧臺委員於兵糧則抵換

醜米於捐款則需索使費鎮江潮勇二千名最爲不法不服調遣  
四出搶掠擾害行旅常州所駐督標新勇七百名亦多劫案皆以  
營盤爲藏身之地無從緝捕又與收養之金陵難民恃眾橫行實  
爲心腹之患等語因思勸捐一事原屬不得已之舉若多設名目  
而利歸浮蠹徒使上擔虛名民受重困既無裨正餉尤恐別起事  
端著何桂清趙德轍將江南抽釐卡局擇其扼要之地歸併數處  
其餘悉加裁汰使便於稽察不令委員漁利及土棍冒名擾及行  
商轉致商人裹足正課無收江北之揚州通泰一帶亦著派委安  
員察訪仍責成文煜及該地方官覈實辦理毋得多派冗員致滋  
流弊其捐輸名目有瑣屑病民者酌量裁撤以歸簡易而杜侵漁  
所有糧臺濫設之委員著會同和春嚴加裁汰其從中射利積慣  
侵吞者嚴參懲辦並將常州所駐兵勇滋事者分別查拏無用者

分別遣散毋令與難民勾結致貽後患以節浮費而靖地方將此諭令知之○丁卯諭內閣邵燦庚長奏擒匪大股攻撲沭陽當卽擊退並將全股勦平一摺擒匪陳遐齡等結夥肆擾又有孟二等率黨厲集膽敢進撲沭陽縣城城中早已準備適參領果全等帶兵追賊至沭陽南岸葉家嶺殺賊三十餘人賊擾新挑河我軍誘敵知縣董保成遊擊海洪阿等伏勇驟起並與城內鄉團聲勢聯絡斃賊數百賊分股過河鈔襲者又經知縣郝植松守備鄭永林等兵勇夾擊斃馬步賊一百數十餘名該匪大潰州兵乘勝窮追沿途擊殺共斃賊一千餘名其餘分竄各路及至海州贛榆等處者兵勇分投截擊並經侍衛伊興額等在二岔河生擒擒首孟二及夥匪潘金朋等三十餘名知府趙作實在伊家林搜獲匪犯張小珩等二十餘名各路陸續搜捕及殺斃合共三百餘名沭陽邵

州宿遷邳城一帶地方均已肅清此股捻匪在新挑河被擊大敗  
全夥散竄徐州兵與清河勇練盡力捕剿殲除殆盡並將首匪孟  
二季廣等擒戮所辦尙爲妥速仍著邵燦等督飭該地方員弁將  
在逃之捻首陳遐齡陳玉標二名緝拏務獲以絕根株而靖地方  
○戊辰諭軍機大臣等王懿德奏閩省軍情緊急餉需匱乏請飭  
廣東浙江省各撥見銀十萬兩等語見在福建上下游各路防剿  
各屬地丁等款已無可徵收兵餉萬分支絀若因欠給過多致兵  
勇紛紛譁潰關繫非細惟粵浙兩省見亦需餉浩繁撥解恐難如  
數著葉葆琛晏端書於無可籌撥之中先各撥見銀數萬兩迅速  
解閩以濟該省目前之急毋稍遲誤又據奏稱閩省郡縣疊陷兵  
力單薄已飛咨江蘇省飭令前上海道吳健彰就近召募廣勇五  
百名管帶赴閩助剿等語吳健彰見在丹陽軍營能否卽帶勇赴

聞著何桂清趙德轍斟酌辦理再有人奏江南各營欠餉甚鉅深虞兵勇潰散所辦釐捐亦不及浙省捐輸之踴躍請飭江浙巡撫公同商酌於浙省中揀派大員會同江蘇司道籌辦餉糈等語江浙胥齒相依總當不分畛域同心籌餉卽著何桂清趙德轍晏端書體察情形會商妥辦將此由六百里各諭令知之○諭王懿德奏馳抵延郡統籌軍情一摺前據慶端奏逆匪攻陷建泰二縣後復竄甯化縣城並勾結千刀會匪連破汀州清流歸化府縣城池此次王懿德奏報僅及建甯府勦賊並甯化縣被擾等語自因文報梗阻未能遽知汀郡情形汀州所屬多與江廣兩省壤地相接並與上游之延平下游之龍巖漳州處處毗連賊勢蔓延亟應杜其旁竄之路見在建郡城圍未解該匪已於雞公嶺築堡安礮阻我進兵之道鍾寶三援師能由福甯直達建甯卽可令與趙印川

所統兵勇上下兜勦以分賊勢建陽逆蹤未退則順昌扼守宜嚴  
延平雖係三面受敵之地王懿德旣已抵郡駐師正可居中策應  
兼顧建汀兩路以爲省垣屏蔽惟林俊率黨復在泉州圍撲府城  
著飭署提督張廣信悉數殲除葉名琛於前撥精兵二千名外再  
酌添一千名或數百名一併赴閩助勦王懿德惟當先就見有兵  
力周密布置以勦爲防不得專待客兵致滋貽誤將此由六百里  
諭令知之○予福建陣亡知縣何鎮之祭葬世職建祠○己巳予  
廣東被戕知縣夏謙祭葬世職○庚午賞已革江蘇巡撫許乃釗  
三品頂帶命往江南欽差大臣和春軍營辦理文案○辛未英桂  
勝保奏擒匪盤踞方家集爲三河尖犄角因大兵進逼堅匿不出  
培壘開濠爲負固苟延之計必須斷其接濟勦辦方能得手見值  
麥秋因撥兵保護村民收穫免致被賊偷割其淮太各縣及周家



口向屯糧米之處飭令地方官凡遇商販非給有印票不准行運並將出產硝磺處所嚴禁出境設卡稽查嗣據逃出難民供稱該逆因資糧不繼恐裹脅之眾一時潰散防備頗嚴然潛逃者每日數十百人不等臣等出示剴切曉諭凡悔罪來歸者許以免死日來解散四五百人旋據龔得等亦以投誠之詞具稟哀懇臣等深知該逆兇狡百出意圖緩兵因密飭將備加意嚴防臣勝保於五月初二日督隊出營嚴陣以待該逆果無降意當令穆騰阿樂善等各帶兵勇分東西兩路前進西面之兵逼近賊巢近至濠邊拋擲噴筒火彈逆眾驚亂東西兩面出賊三千餘名拌死圍裹穆騰阿法克吉布分帶馬步隊衝擊殲賊五百餘名餘賊狂奔回巢死守臣等因思該逆分踞洪河兩岸僅攻北岸終難得力遂添調總兵邱聯恩知州蒯賀孫知縣廖慶謀等各帶兵勇潛赴南岸埋伏

初九日五鼓臣勝保親督大軍與穆騰阿樂善等自北岸進攻乘霧越濠拔幟將入賊壘逆眾併力拒守我兵拋入火具焚斃無數並破其牆圍南岸之賊纔擁來援我兵擊殺甚多南岸伏兵出其不意直薄賊壘賊不及防破圍而入乘勢追殺賊屍枕藉立將洪河浮橋燒斷並焚南岸房屋賊匪窮蹙向北岸爭撲兵勇槍礮刀矛並進殲斃及淹斃焚斃者積屍滿河潰逃之賊亦追殺殆盡共斃賊三千餘名臣勝保恐該逆被創逃竄豫撥馬隊在徐家橋地里城一帶埋伏是夜有賊騎數十束駛立時擊殺十餘人地里城亦來賊騎二百餘經法克吉布等追殺四五十人餘皆敗退回巢據獲匪供稱逆首孫葵心已在陣前殲斃翼得受傷甚重見擁眾二萬欲往三河尖邀集黨夥再圖拒守或竄逸他處等情又據署廬鳳道金光筭來稟張落刑等因恐三河尖不能久踞以三百餘

船載輜重順流而下意欲運送雉河老巢路過正陽關經該署道率兵勇擊沈賊船數十隻殺賊數百名因賊眾太多力難截回已向東北竄駛當即飛飭下游各州縣迎頭堵截等語查見在賊情精銳均在方家集既被剿窮蹙惟有趕緊進攻一俟削平賊壘即行進擣三河尖老巢以期盡殲醜類但恐該逆或西竄新息或東趨正陽關以圖回竄雉河除由臣等酌派兵勇嚴扼西路並咨照袁甲三堵遏北路其正陽關東路止有金光飭兵勇在壽州等處防堵兵力尙單查秦定三一軍在皖年久地理情形俱爲熟悉見聞有出臨淮前往句容之信因思江南軍務尙爲得手在彼似非必不可少之兵應請旨飭下秦定三帶領兵勇移紮正陽關相機截剿以杜紛竄而固藩籬 上諭軍機大臣等竊逆大股捻匪經官軍南北夾擊窮蹙已甚正當四面圍攻殲除淨盡如果接濟斷

絕嚴密合圍自不難聚而殲旃惟此時邱聯恩一軍已調赴禹州甯夏續調官兵又截畱省城龍澤厚一軍尙未到營誠恐兵力不敷圍剿該逆又將乘隙竄逸英桂等務當趕緊進剿就近殲除設有逸出敗匪卽撥馬隊追蹤趕剿勿令更擾他處先將此股殲盡則三河尖賊勢自孤剿辦更易得手至張逆先遣輜重竄越正陽關雖據聲稱意圖回竄雉河亦難保不因方家集賊巢垂破豫圖別占地方以爲犄角之勢見在秦定三一軍已於前月二十四日啟程前赴江南勢難再令折回著英桂勝保酌度緩急應如何分兵協助金光筋之處卽行妥籌速辦並一面知照袁甲三嚴防雉河杜其回竄又英桂片奏派兵剿辦禹州匪徒等語此股匪徒距省較近亟應迅圖撲滅著卽飭知邱聯恩等趕緊剿捕勿使滋蔓龍澤厚一軍前據曾望顏奏稱已令挑選精銳一千名剋日赴豫

著英桂飛咨催提如該副將到豫禹州匪徒已盡卽飭馳赴大營聽候調遣不可令其株守宛郡將此由六百里諭令知之○癸酉烏什辦事大臣保恆等奏開墾烏什駱駝巴什地方荒地並挖渠道等工完竣請自咸豐八年爲始援照成案每畝五升科則一律以小麥升科如所請行○甲戌諭軍機大臣等葉名琛奏糧價驟長請在鄰省招商免稅以資接濟一摺廣東省民食向藉粵西販運及洋米入口接濟粵西路梗兼之上年各屬歉收洋米亦復不至以致糧價翔貴福建湖南兩省皆與廣東接壤著王懿德慶端駱秉章各飭所屬州縣徧行出示曉諭勸令商人多運米穀赴粵羅賣由官給照經過關卡概免納稅沿途經過地方嚴禁奸徒畱難阻滯湖南商販徑由樂昌仁化等處運入廣東福建商販或由潮州府屬入境或由海道徑達廣東省河各任其便庶足以廣招

徠而資民食再湖南舉人左宗棠前經曾國藩奏保以郎中分發兵部行走復經駱秉章奏該員有志觀光俟湖南軍務告竣遇會試之年再行給咨送部引見見當軍務需才該員素有謀略能否幫同曾國藩辦理軍務抑或無意仕進與人算合難以位置著駱秉章據實具奏將此由五百里各諭令知之○諭福濟鄭魁士奏通籌各路情形請飭催李孟羣帶兵來廬等語皖省軍務自桐城退守以後六安等處均爲賊踞自應厚集兵力以圖攻剿李孟羣一軍由湖北赴援途次克復英山而該逆復糾大股屯踞張家坊地方圖襲黃梅大軍之後該藩司見在羅田霍六一帶節節進攻遏其上竄武漢之路卽以埽蕩廬州附近之賊並非遷延不進該藩司已入安徽境內非同遠在他省福濟等何以不通消息至於請旨飭催著卽探明李孟羣行至何處自行札商屬令酌量緩急

相機前進儻沿途賊匪尙煩兵力亦豈能舍應剿之賊專以保守廬州爲事著福濟鄭魁士先就見有兵勇妥爲布置實力防剿毋稍疏失至所參奏定三擅將畱守臨淮之富和關保並吉林馬隊帶往江南及浮支兵餉等情當再諭知和春查辦也將此由六百里諭知福濟鄭魁士並傳諭李孟羣知之○先是駐藏大臣赫特賀等奏整飭番兵營制酌擬章程六條一唐古忒番兵每遇缺出隨時挑補該管番員不得任意停壓一藏營番兵爲數無多請於番民挑選餘丁二千一百六十五名充額設番兵應遵乾隆年間舊章仍使漢番互相稽查一唐古忒番兵所需鳥槍刀矛不敷應用擬令噶布倫等官及前後藏世家捐貲籌辦酌予議敘一前藏地方遼闊奸宄易於潛蹤兼之廓番往來通衢稽查尤關緊要請於駐藏大臣巡閱之外酌委將備巡查一將備慎重操防噶布倫

等應約束番服無事不得與廓番往來免致別生事端命軍機大臣會同兵部理藩院議至是奏均應如所擬辦理從之○子安徽陣亡參將章金章廣東陣亡學正蕭廣輝祭葬世職○丙子諭軍機大臣等前據德勒克多爾濟奏俄羅斯咨行理藩院文稱欲由黑龍江徑行赴京當卽諭令景瀄奕山等據理攔阻茲又奏稱欲由天津赴京商禦英吉利法蘭西之事該使臣已於五月初五日由恰克圖啟程約略閏五月二十日前後到津等語曾諭理藩院行知該國並無機密要事可商毋庸特派大臣前來著譚廷襄密飭天津鎮道妥爲防範不可稍事張皇將此密諭譚廷襄並傳諭長蘆鹽政烏勒洪額知之○戊寅諭內閣我朝 積德累仁燕天昌後 皇考宣宗成皇帝於載字輩公以下續選溥毓恆啟四字依次命名洵足昭佑啟而迓蕃釐朕惟雲祚遞衍卜世延長特



命大學士軍機大臣續擬四字同道光六年存記六字開單具奏  
茲據恭擬進呈經朕選用肅闡增祺四字自啟字輩分以下按字  
命名引用勿替其餘六字仍著軍機大臣存記俟將來續擬時再  
加四字一併進呈候朕酌定我國家景祚延鴻億萬年繼繼承承  
永遵令典此旨並著繕錄二分一交內閣一交上書房封識○諭  
王懿德奏江西逆匪竄入閩境邵武等處相繼失守請與巡撫一  
併嚴議等語王懿德慶端均著加恩改爲交部議處○諭王懿德  
奏官軍剿賊大勝建甯郡城解圍一摺署建甯府知府劉翊宸會  
同文武固守深得民心該紳民等屢助官軍殺賊共保危城均堪  
嘉尚所有此次出力文武員弁兵勇紳民准其擇尤保奏仍著督  
飭在事文武迅將匪徒乘勢剿滅克復邵武等處城池毋任延蔓  
○予福建殉節道員王訓等祭葬世職建祠○已卯諭內閣戶部

奏軍需鉅款延不報銷請將承辦各員先行懲處一摺江南大營糧臺自咸豐三年正月起到七年正月止均由前任長蘆鹽運使彭玉雯江西鹽法道熊莪經手辦理迄今並未將支放款目報部節經該部嚴催仍復延宕逾限日久款目愈紛轆轤愈甚必致蔓無稽覈該員等專辦糧臺自應依限造報何以屢催罔應難保無意存含混豫爲冒銷地步彭玉雯熊莪均著先行摘去頂帶交部嚴加議處仍責令趕緊造冊報部聽候查覈儻再遲延著該部再行嚴參查辦至該糧臺襄辦委員人數尙多相率疲玩均屬可惡著何桂清查取職名分別年月久暫一併交部議處○諭軍機大臣等英桂勝保奏酌留馬匹並請飭催兵勇等語官軍克復方家集亟應乘勢進剿所有撥赴廬州馬一千匹准其酌留四百匹徐州土駒卽就近解赴廬州備用並分咨邵燦庚長福濟遵照辦理

其餘馬六百匹仍迅速解往廬州毋得再行截畱至龍澤厚一軍業經赴豫著英桂勝保仍遵前旨飛咨迎提黃良楷練勇前據崇恩奏該員見在患病已挑選練勇八百名派候補守備李琦龍候補知縣劉錦堂等管帶啟程等語此項練勇諒亦卽日到營矣另片奏請飭山西撥借銀十萬兩等語山西籌解京餉及各處軍需甚多恐未能有此鉅款接濟豫省惟不過暫時通融或可移緩就急已諭令王慶雲酌撥銀數萬兩解赴英桂等軍營俟河南下忙錢糧收有成數卽著如數撥還山西毋許稽延將此由六百里諭令知之○諭見在英桂等勦辦方家集捻匪業已攻破賊巢辦理尙爲得手惟兵餉短絀自應力籌接濟著王慶雲設法籌措酌借銀數萬兩派員解往英桂等軍營以濟要需俟豫省下忙錢糧徵有成數卽行歸款將此由五百里諭令知之○英桂勝保奏

臣等

攻破方家集南岸賊巢後卽於四月十一日督兵由東北進攻乘風施放火器傷斃守牆賊匪甚多正欲踰濠登壘忽由西面擁出馬步賊數千鈔我後路臣勝保令各隊分三路迎擊其步賊被我兵槍斃無數馬賊亦經吉林黑龍江馬隊擊斃二百餘名當卽敗退是夜我軍暗襲賊營甫登濠牆逆黨死拒經兵勇用長矛刺斃數十人賊眾驚擾自相殘殺不計其數十二十三等日連次進攻用大礮轟塌賊壘斃賊甚多南岸之兵復燒毀賊船十餘隻十四十六等日該逆全股撲出臣勝保派穆騰阿領馬隊樂善領步隊嚴陣以待該逆知我有備將欲退回我兵乘勢壓下逆眾狂奔被殲甚多臣等以賊窮思竄當卽會商布置臣英桂仍駐紮驛口橋督飭兵勇嚴扼西北竄路臣勝保卽於十七日派樂善率格洪額王鳳祥等各帶兵勇分三路進攻該逆列隊於壘左右見官兵前

進意在奪路而逃勢極洶湧我兵開放槍礮擊斃無算該逆不及回巢全股向東南奔逃我兵乘勝擁入濠牆焚其木柵殺未逃之賊約二千人救出男婦幼孩數百立將賊壘一律平毀其逃竄之賊飛飭穆騰阿帶馬隊分三路壓下臣勝保亦親督步隊追擊至地里城一帶追殺三十餘里賊屍枕藉餘賊數千向王家壩老觀巷三河尖賊巢逃匿一面飛飭邱聯恩蒯賀孫廖慶謀由南岸迅赴徐集一帶駐紮以防南竄臣勝保卽日進紮中興岡居王家壩三河尖之中以便相機進攻使該逆首尾不能兼顧查亳州鄧王二圩一帶伏莽止圖牽掣我師若能將三河尖等處大股殲除自易次第蕝事無如臣等兵力僅有此數又三河尖跨河爲巢萬難合圍已飛飭署廬鳳道金光飭由東路正陽關一帶設伏橫擊以遏賊匪竄回雉河之路並飛調山東道員黃良楷迅速前來以

資攻勦惟到營尙無確期深恐緩不濟急臣等惟有就此得勝之師極力攻勦仍相度緩急分兵遏截邱聯恩連日追賊喫緊未能卽往許禹一帶勦匪又此股匪徒業經地方官截拏欲竄回角子山巢穴臣英桂以軍情旦夕異宜當卽飛飭臬司周士鏜先行出省督率許州一路兵勇緊躡賊蹤認真勦辦俟三河尖王家壩等處攻勦得手南岸之兵堪以酌遣再令邱聯恩帶兵赴葉縣等處會剿所有此次督攻方家集尤爲出力各員先行開列懇恩獎勵其餘出力員弁兵勇俟查明彙奏請獎奏入賞邱聯恩巴圖魯名號樂善提督銜○庚辰夏至祭地於方澤○是月展緩廣東海豐等三縣被擾未完地丁銀米撫恤直隸東明縣被水災民